

呂東萊文集

二





叢書集成

初編

主編者
王雲五

商務印書館發行

呂東萊先生文集卷四

書

與朱侍講元晦

論語精義近得本。日夕玩繹。類聚皆在目前。工夫生熟。歷然可見。與分看甚不同。此間學者多欲看而難得本。告諭販書者。令多發百餘本至此。爲佳。序引中說魏晉及近世講解。此意尤好。但中間說橫渠及伊川門人處。如伯夷、伊尹、與顏、曾等語。卻似筋骨太露耳。更潤色。令意微而顯。乃善。蔡子資質在流輩中頗醇厚。對策病痛。前此固嘗面諭之矣。委曲之說。誠切於近日學者之病。計校避就。真是私意。比看易无妄傳云。雖無邪心。苟不合正理。則妄也。乃邪心也。益悚然自失。因思去歲給札當時本意。欲俟數月間得對展盡底蘊。故事事未欲說破。緣此回互。卻多暗昧處。此政易傳之所謂邪心也。來教藏頭露影等十數語。句句的當。敢不虛心敬承。繼此如有舊病。餘疾。切望不可一毫放過。痛加砭治。乃幸。危論駭世。清風激時。不記曾有此語。意與此相近。亦不可知。恐聽傳或轉了語脈耳。然夫子所謂危行。言孫與夫孫以出之。恐卻須深留意。蓋隨時如此。則處之者如此。乃易直之理。與回互避就。似不相干。不知是否。陳同甫近一二年來。卻翻然盡知向來之非。有意爲學。其心甚虛。而於門下向慕尤切。但渠目下以家事。勢未能出。兩三年間。必專往求益也。長沙卻常得書。亦彼此時有所講論也。

近麻沙印一書。四五朝名臣言行錄。板樣頗與精義相似。或傳吾丈所編定。果否。蓋其間頗多合考訂商量處。若信然。則續次往求教。或出於他人。則雜錄行於世者。固多有所不暇辨也。

致知力行。本交相發工夫。初不可偏。學者若有實心。則講貫玩索。固爲進德之要。其間亦有一等後生。推求言句工夫。常多點檢。日用工夫。常少。雖便略見彷彿。然終非實有諸己也。默而成之。不言而信。存乎德行。訓誘之際。願常存此意。夫子教人。亦有可以語上。不可以語上之別。如堅確有志實下工夫者。自當使之剖析毫芒。精講細論。不可留疑。如初基乍入者。似未可遽示之所見未到之理。卻恐其輕看了也。然亦非謂使之但力行。而以致知爲緩。但示之者。當循循有序耳。

諧俗以自便。有此病痛者。滔滔皆是。談空以爲高。眼前卻不多見。蓋異教桀黠者。皆盡。而士人多墮在苟且委靡。鮮有能自開戶牖者。今所患者。吾道之未明。而異端則未必如何時之熾然也。

淵源錄事書。藁本復還納。此間所搜訪可附入者。併錄呈。但永嘉文字。屢往督趣。猶未送到。旦夕陳君舉來。當面督之也。淵源錄。其間鄙意有欲商榷者。謹以求教。大抵此書。其出最不可早。與其速成而闕略。不若少待數年而粗完備也。汪丈說。高抑崇有伊洛文字頗多。皆其手澤。故子弟不肯借人。已許爲宛轉假借。若得此。則所增補者必多。推此和言之。則毋惜更搜訪爲善。只如語孟精義。當時出之亦太遽。後來如周伯忱論語。橫渠孟子等書。皆以印板既定。不可復增。此前事之鑒也。橫渠集續收者。本欲便刊。以近得張丈書。復尋得一二篇。俟其送至。乃下手。此亦開板太遽之失也。

某病體萎痺。雖無加損。卻無他撓。爲况亦甚安適也。張五十丈。遂至於此。痛哉痛哉。聞時適方飯。驚愕氣通手足厥冷。幾至委頓。平生師友間。可以信口而發。不須揀擇。只此一處。爾祭文謹錄呈。雖病中語言無次序。然卻無一字粧點。做造也。丐祠復不允。勢難再煎。迫諸公。又目前亦無太齟齬。可決去就。莫若暫爲小安計。整頓郡事爲善。其詳。口授舍弟拜稟。它乞厚爲道義護重。

降付後省之說。必是虛傳。此間卻不聞也。尋常條陳利害文字。乃送後省看詳。若深於此者。有聞或宣付宰執略看。卽復進入。少有付外者。似聞揆及新參。皆常於榻前調護。以近例觀之。縱使無人調護。亦不至有它甚不相諒者。不過以爲好名耳。比得檢正舅氏書云。嘗得來教。微及有所建白之意。如舅氏之靜密。固自無害。萬一於其他親舊書。亦復及之。則非密贊聰明。居以俟命之意。至於播揚招悔。各尙所不論。繼此望深以爲戒也。交印之後。旣不過三季。若郡中別無大齟齬。不若安心爲之。整頓郡計。俟終更還家。然後請祠。最爲穩當。鄭景望自寧國歸。過此渠。亦是未滿。前年歲間。不曾通政。府書直至。細滿亦無問。此法自可用也。保養姦兇。以擾善良。固君子之所恥。要當無忿疾之意。乃善。詩云。豈弟君子。民之父母。須使人入境問俗。便覺此氣象。若霜雪勝雨露。則不可也。陸子靜近日聞其稍回。大抵人若不自欺。入細著實。點檢窒礙。做不行處。自應見得。渠兄弟在今士子中。不易得。若整頓得周正。非細事也。受之所請。建家廟。初不能備廟制。但所居影堂。在堂之西邊。位置不當。又去人太近。不嚴肅。廳之東隅。有隙地。前月下手。一間兩廈。頗高潔。秋初可斷手。作主只依前所示祭儀中制度。時祭及朔望薦新之類。亦隨力就其中。揜節耳。

宗法春夏間嘗令諸弟讀大傳頗欲略見之行事其條目未堪傳家問與叔位同居向來先人以先叔久病之故盡推祖業畀之後來看來兩位藐然卻無係屬處今年商量兩位隨力多少拊辦一項錢共祭祀賓客等用令子弟一人主之今方行得數月須俟數年行得有次序條目始可定也受之近日漸解事性氣方亦減同舍間及渠家上下皆稱之殊可喜也伊川和靖墨蹟已刊向聞刊康節詩因便求一本某近日看書甚少每早飯後卻不復緝閱如詩方整頓到車攻蓋每日只理會一章或兩章可見其少也新簽聞是士龍宗族往時卻不曾見士龍說及不知其人如何周子充入參雖不能大有所正度亦必時有微益尋常病中不曾特作臨安書俟渠或有書來自當盡誠告之也定叟以喪事請祠差慰人意因書望時有以啓告之父兄擔子雖不易承當若隨分數勸得些少於渠門戶非小補也王信伯集初謂印板所刊必多此數篇則舊固見之矣今復還去

丐祠雖未愜雅志然諸公不欲賢者家食雖未必由衷然亦善意也但有畏不能容賢者之謗比之全不分皂白者亦有間矣張荊州病中請祠亦有苦勸當途令從其請者亦以向來之嫌畏人議論不能容之遂堅不肯從但作帥與小軍壘不同但須內外至誠相與首尾相應乃不誤事既非心相與則自有首尾衡決處如來教數條皆是也符節在身不得擅去此所以憂而至於病病而至於死每誦量而後入不入而後量之語爲之泫然至於南康地既非要害民又非浩穰雖事之不如人意處固多然無旦夕立至之憂若且耐煩忍垢樹摩疲民苟稍成頭緒子重繼之必能遵守使一方之民小小休息亦不爲無補也今

去終更纔半年餘耳。交印後，身便自由。惟吾志所欲無不可者，或未終更別有除改半道引疾而歸，亦甚省力。陸子壽前日經過，留此二十餘日，幡然以鵝湖所見爲非，甚欲著實看書講論，心平氣下，相識中甚難得也。近因荊州之赴，深思渠學識分曉，周正如此，而從游之士，往往不得力。記得往年相聚時，雖未能盡領解渠說話，然覺得大段有益，不知其他從游者，何故乃如此。蓋五十丈不能察人情虛實，必如某之專愚毋它，其教誨乃有所施耳。若胸中多端者，雖朝夕相處，未必能有益也。中庸論盡己之性，又繼之以盡人之性，盡物之性，工夫無窮如此。此豈追往事，亦要高明深勉之耳。五十丈所作濂溪祠堂記，告粧褫一本送示，欲掛壁間觀省耳。親舊間多相勉撤去書冊，固知此理，但舊所偏嗜，未能頓去，近亦十減五六矣。如時文卻不曾與人看，受之在此作課，亦只是舍弟輩爲之點檢也。

某病體，夏中粗無他，雖深風遠痺，非藥石所能料理，然神氣漸似完固，杜門養靜，亦殊有味也。奏封出於忠憤懇切，固不可遏，上容受讜言，亦不以爲忤，但以鄙見言之，不若積此誠意，當其可而發，乃深厚有力。爾張五十丈祭文，前月已見初本，今又復領後篇，精義至到，讀之令人泫然，不惟痛逝者之不可作，又竊以窺任道之志，屹然益堅，幸甚。願言勉之，使弘大平粹，則見諸行事，垂諸方冊，皆可以爲後學模範。吾道之幸也。大抵稟賦偏處，便使消磨得九分，觸事遇物，此一分，依前張王要須融化得盡，方可爾來論所謂未得力，恐只是用力，猶未至耳。自己工夫緊切，則游從者聽講論，觀儀容，所得亦莫不深實矣。不識高明以爲如何。白鹿洞記摹刻精甚，但淺陋無所發明，祇增愧怍。它石刻皆已領，盛熱不能多作字，謹口授舍

弟拜稟。他祈爲斯文崇重。

稍不上記。政劇傾仰。伏辱手教。并墨刻。不勝欣懌。旱勢甚廣。不知封內近得雨否。荒政措畫次第。無所不用其極。尋常小郡。患於叫喚不應。如南康今日事體。則不然。苟爲民而屈。至誠懇惻無疑。外入細商推使。彼可從。自應有濟。但恐辭氣勁厲。在事者便謂欲獨爲君子。愈扞格不可入耳。其他皆高明所洞達。獨此說。似可爲獻也。再祭張五十丈文。本以告逝者。復何所嫌。第不必示不知者爾。前書拜稟。蓋謂世衰道微。正欠人擔荷此事。幸而有之。唯願其進德修業。日新又新。使學者有所矜式而已。非於此有所疑也。示諭自反深切。益令人歎服。當仁不讓。檢身若不及。兩句初不相妨。堅任道之志。而致細察之工。乃區區所望也。新參非無倦倦之意。但病在力不足。往年相聚論之熟矣。比因答書。亦嘗詳告之。政恐未必能有益也。受之日來儘解事。唯是志向。非它人所能與。每相見。亦未嘗不盡區區也。某病體只如故。但無求痊望愈之心。度歲月卻不覺費力。省思慮之戒。敢不佩服。尤延之說祭文極是。蓋當時傷感之意多。自應迫切耳。詩說止爲諸弟輩看編得。訓話甚詳。其它多以集傳爲據。只是寫出諸家姓名。令後生知出處。唯太不信小序一說。終思量未通也。其它受之當能道。已詳語之矣。餘乞爲道。甚重。某病倦。稍不上狀。倦倦第有傾向。疚心荒政。聞極勞瘁。然到得措畫不行。求牧與芻而不獲。便有歸諸其人之義。不必耗損神氣。所繫殊不輕也。一月前得原伯舅氏書。政府許求祠。已專奉報。想久已入文字。如不遂請。而郡中漸可支柱。爲飢民少留。亦君子之志也。但報狀中獨未見得請。何耶。某病體只如舊。但近

常發瘧。又加疲薻爾。昨日忽被堂帖還故官。病廢如此。尙未能出門戶。况仕宦乎。但虛煩除書爲愧耳。聞臨安知舊。皆知其不能就。特揆欲以示善意。一兩日自列乞依舊奉祠。計必見聽也。舊從學毛大方仲益。往視其弟。因欲請見此子和。易知自愛。卻可與語也。匆匆未能他及。向寒。惟祈斯文甚重。

某稍不聞問。政此傾向。受之來辱。手教且能道近况之詳。極以爲慰。荒政既粗。可枝梧。又諸公略相應。自無辭求去。只得爲民少屈。以須終更也。某瘧疾方安。尋被除目。不免親作數字。懇政府甚覺疲倦。所幸相諒。既見聽矣。但傳聞猶有參議官指揮。病中亦何緣赴得。又須費一番書札也。陸子壽不起。可痛。篤學力行。深知舊習之非。求益不已。乃止於此。於後學極有所關繫也。痛痛。張五十丈遺文。告趣郡中有筆。力早寫一本見示。極所渴見。不必待編定。亦不以示人。方其無恙時。謂相見之日長。都不曾鈔錄。今乃知其可貴重也。言之涕下。手倦不能多及。向寒。唯爲道義自重。

某方作書畢。劉平父轉教賜。謹悉。尋常雖未嘗預此事。以吾丈之委屬。劉樞之賢。敢不盡力。但目前未有其人。年歲間。倘見有可者。常關白也。近有建昌士人陳剛正。已相訪。種種皆與人合。十年來所未見也。工夫淺深。自是渠事。大槩只是當耳。渠今冬來春。爲五夫之行。如此等人。方始不枉與說話也。

某手凍未及拜書。祠官幸已得請。自此遂可奠枕矣。解組不遠。至時趣子重來。合符而歸。最爲上策。切不可須求祠。恐諸公意。不過別有除改。卻是自引惹也。

便中伏領教字。殊以慰懌。前日見邸報。江西之命。聞尙有兩政缺。足可優游求志。想甚稱愜也。某病體萎

雖不可復料理。然意緒日日增勝。觀書亦粗有味。舊來寬弛昏惰之病。似漸刊落。今方可奉承誨藥。而疾病又錮而留之。徒向風浩歎而已。前歲問疾之諾。日下雖非其時。它年終覬踐言也。陸子靜留得幾日。講論必甚可樂。不知鵝湖意思。已全轉否。若只就一節一目上。受人琢磨。其益終不大矣。大抵子靜病在。看人而不看理。只如吾丈所學十分。是當無可議者。所議者。只是工夫未到耳。在吾丈分上。卻是急先務。豈可見人工夫未到。遂并與此理而疑之乎。某十年前。初得五峯知言。見其間滲漏張皇處多。遂不細看。病中間取繙閱。所知終是端的。向來見其短而遂忽其長。政是識其小者耳。子靜許相訪。終當語之也。長沙之行。須寄徑新治。不知不以爲嫌否。定叟書漫納去。書中欲求五峯皇王大紀。及正蒙內篇。若只遣人行。亦乞附行也。受之挈家歸五夫。匆匆上布。渠近來漸解事。性氣亦減。已是人家佳子弟。但志業未甚立。此乃擇師不審之咎。一味悚惻而已。它祈厚爲道義。甚重。

某比因南康人行拜狀。當既呈徹。承聞有令妹之戚。手足之重。何以堪任。唯覬勉自開釋。至扣至扣。乍還田廬。釋簿領之勞。爲况必甚安釋。病魔無由陪侍。猶恃問疾之約。賴以自寬耳。毛椽所附手教。已領。此郎舊雖相從作舉業。不登門久矣。他祈爲斯文。甚重。

受之乍別。甚思念。辱書及竹紙。皆收。通鑑綱目。且錄兩漢以上送示。只要大字。注不須。字數亦不多也。某不聞動止。惓惓第劇尊仰。代者必如期合符。計程當已達五夫。適此梅雨。跋涉亦不至勞頓否。某病體雖不復可料理。然自去秋。稍稍勉習。執匕筯。繫衣帶。入夏來。浸覺可牽強。衣服飲食。遂不須人。亦病中一

快也。心閑無事，讀書亦粗，似有味，但塊然索居，無從質正，夢寐間疾之語，殆以日爲歲耳。張五十丈遺文，想已鈔錄，得付此介，甚幸。定叟書，不知已附便否，匆匆布稟，它所厚爲斯文保重。

受之未及別書，近日不知作何工夫，通鑑綱目，只欲傳大字，此便回先錄戰國、西漢，寄示，字數亦不多也。

某病體度暑粗安，前書所說著衣喫飯，不復仰人，其實仰人，但是勉強，積習僅能執捉，自病中言之，則稍自如耳。若比平人，不爲快便，蓋萎痺已成沈痼，非湯劑所能料理也。所幸閑中浸有趣，仰俯一室，極覺安適，度去死尙遠，未爲師友憂。讀書雖略有課程，如詩解，多是因集傳，只寫出諸家姓名，縱有增補，亦祇堪曉帝蒙耳。大事記，以不敢勞力索考，有時取編過者看，百孔千瘡，不堪點檢，且欲住手，再整頓。若盡此歲以前，須稍見頭緒，是時當逐旋錄數段，往求教也。鄭景望不起，亦可痛，善類凋落如此，奈何。詹體仁近亦送葵軒論語來，比癸巳本益復穩密，以此尤欲見晚年論述，刊定畢，并與原稿送示，爲幸。受之近日肄習稍勤否？資質本明爽，向來在外舍，深居罕出，所以悠悠，今擇勤苦有志之士，與之游處，必須勉厲也。仙洲增勝，雖無由陪談賞，然年來屋後花竹成陰，隨分亦可自娛，猶覲杖履一臨之也。文鑑以趣辦去，取不當必多，有大悖理處，因筆望條示，雖不可追改，猶得以警省爾，匆匆拜稟，他所厚爲斯文崇重。

與周丞相子充

某八月末，暫往會稽，省外祖母，留二十餘日，乃歸。初欲迤邐爲天台雁蕩之行，偶得朱元晦書，欲來春同

游須少俟之。今冬遂不復出。閉門卻掃。乃無一事。讀書亦稍有趣。第恨相望邈然。無由款奉燕談。每深浩歎。邇來日用踐修之詳。與夫游泳筆墨。因風示以一二。沃此虛渴。不勝系望。子中兄官期不遠否。會次。望致敬仰之意。劉子澄時通問否。近偶作哭芮丈十絕。向來欲出數語。中間憂制。故迤邐至今。詩初非所習。正以其往時有不敢作詩之語。深愧此意。聊掛延陵之劍耳。亦謾錄呈。

比聞趣召之命。公道所繫。實在此行。雖如惰退之人。與世久不相關。猶不能不爲善類賀也。深誠體國。蓋有自來。竊想徒御既次近道。導迎善氣。合和朝廷。乃衆正所以獨屬於門下者。默觀徧察。累年於此。計必有以處此矣。其闔門久益有味。但索居難得朋友。前月末。偶陳君舉來。相聚山中數日。殊不落莫語。次未嘗不南望車塵。慨然懷想也。薛士龍之子。比屬某誌其墓。欽夫已欲爲書丹。其子欲求碑額於門下。君舉與其子。旦夕自專拜書矣。

靈洞雖得一日之款。然猶恨倥傯。所欲言者。不能展盡。繼聞西清勸講之命。雖與善類同慶。以久屏居。不作都下親故書。無由貢問。便中共被手教。下情不勝佩服。某還舍已兩旬。休惕既定。終日蕭然。乃無一事。但學殖不進。方將深求其所未至。不敢安於恬適之樂也。舍弟累獲親炙。不勝感荷。渠亦能具道誨諭之詳。皆已敬悉。詮試渠初以不習舉業。甚憚此行。今亦且得一事了耳。眷聚莫已。往般挈否。爲近臣體國之義。所宜從容調娛。裨益元氣。非若匹士以潔身爲諒也。

垂諭館客可相伴者。再三搜索。面前相識。偶皆不在臨安。適有俞汝諧者。往參太學。在持志齋。頗謹厚。尺

隨常行者略指授。度亦能代價。作律賦稍工。令似若來。卻可與之商量。雖未知趣向。不足以陪談燕。至於強立知見之病。則可保其必無也。

某一秋多在山間。前月末始還城。早寢晏起。隨意繙書。亦粗有以自適。但得常頑健如此。僥倖已多。它非所及也。邇來寵數頻仍。高懷澹然。亦何足爲損益。第治表旣見。欣然爲善類喜。而職親責重。又恍然爲門下慮耳。推轂人物。實培養基本之先務。第向來所接識者。亦旣在鑒裁之中矣。憂患以來。遠跡事外。後來之秀。皆罔聞知。故無以應命。苟益充是心。咨謀不倦。自應多得實材也。

某退藏里閭。嗒然無復餘念。新歲來。方欲再理舊書。爲十年調度。但無它撓。使得一意講磨。志願已畢。過是皆非所及也。前此聞端尹之命。唯慵惰不與世故。亦欣然喜而不寐。本根之地。竊計朝夕薰陶。深培厚養。爲益旣多。善類所以拳拳於門下者。唯此一事。自餘皆未足言也。正道不絕如綫。唯冀思碩果不食之義。爲斯民少屈憂國之念。過於潔身。則非所願望。

旬日前。至三衢。哭汪丈。逮今意緒慘愴。典刑文獻。盡於是矣。

某屏居粗遣。不足塵矜念。示諭足見驚懼之意。然實有裨補。則不必蹟之外見。事有次第。則不必人之遽孚。體國旣深。自信必篤。若過自退託。則非衆正所以仰恃於門下之意也。子上兄徧游天台。鴈宕。不勝健羨。一書告爲通呈。欽夫報章。併拜納。得附的便。甚幸。子澄待命公車。甚久。不知已有所授否。悻悻遽去。固傷事體。若濡滯淹時。則亦當推愛人以德之義。有以處之。爲善。

某屏居粗遣。一夏別無出入。閉門讀書。足以自娛。他無足云者。子澄遭憂。甚爲之駭痛。盛暑遠歸。不至成疾否。慰疏欲乞附廬陵。專使蓋婺女。絕難得便也。唐與正喪母。亦方兩日。可傷。鄭景望之去。邦人甚去思。然此公論正而氣和。還朝必有裨補。第未知處之何如耳。朱元晦久不出。勢難卽起。若再三敦迫之。恐亦不得而辭也。魏元履恤典。鄭鑑召試。皆所未聞。此數事駸駸有陽復之漸。竊計彌縫調護之功多矣。於此倍須愛養。正警懼之時也。

某屏居粗安適。日來讀書。視舊頗不鹵莽。若得十數年休暇。無他病撓惱。於句讀訓詁間。或粗有毫分之益也。祠祿。至十二月初乃滿。冗食官倉甚覺不安。若自此復得一兩任。則南畝銖積。亦可供伏臘。便不須仰祿矣。惰退之跡。不欲自通於諸公。若是時。吾丈猶在朝。爲致一言甚幸。今未須也。沈叔晦。而諒確實。士人中極不易得。莫己有所授否。劉子澄絕不得書。念之每往來於心也。潘嚴州女子。適其弟在婺。往還甚熟。爲郡有愛民之意。甚知敬慕。所以欲達姓名之意。無它。恐州郡間時有合整頓利病。欲得咨稟耳。近辱教况。下情不勝銘佩。某病體。入冬來差覺勝前。但手足腰髀。時有堅強處。故未自如耳。藥物日進三四服。未嘗廢炙艾。醫者以云血本少。用火則益燥涸。以此猶未決也。請外見卻。近臣與國同體。不得盡伸己志。君子在朝。要自有不知之潤也。欽夫旣按吏未報。而復遣本州倅往攝事。彼安得不猜懼。其處事誠太疎。書當規之。但施行旣爾。遠方觀聽。便輕緩急。必號令人不動。非獨渠私利害也。旬日前報狀中。見黃德潤初對文字。藹然真吉人之言。可爲善類賀。令嗣聞已赴官侍旁。莫別有弟姪相伴否。匆匆拜稟。他

祔厚爲期文甚重

見加恩諸制愈出愈新。略無倦筆。所謂方叔克壯其猷者也。持此求退。不亦難乎。一笑。某積釁所鍾。新婦竟至夭折。悲悼殊不能爲懷。病中復遭此戚。極覺委頓。兩三日來。始似粗可撐拄。恐遠貽憂念。故力疾作此。拜稟明堂後。自列甚善。逶迤許久。惓惓之義。固有所在。均其勞佚。茲其時也。子澄近亦得書。誨諭深所降歎。采葑采菲。無以下體。古人政如是耳。文潛不擇劇易。自其所長。但不知幕下有沈實持重。好謀而成之士否。元晦聞丐祠甚力。前此固嘗勉其耐煩。度終不能俯仰。久必多與物迕。不若聽其去。乃所以全之也。

某近領手帖。殊以慰懌。病體幸無他。靜養順聽。胸次甚泰然。今秋舍弟又得一子。遂了得立後。又幼弟奏補兩事。樂天詩云。我是人間事了人。僥倖殆類此語也。比見奏請依字文字。鄙意恐不須上。前史乃美儲宮之恭畏。非謂其餘臣下。在禮。君沐梁。大夫沐稷。士沐梁。地遠者固無嫌也。秦漢以後。只患上太尊。下太卑。如地天泰。畫卦之意。恐卻合常及之也。不相樂者。無事猶欲造言。安知不有趙野君主天玉之嘲乎。自病廢來。邸報中事。豈復關心。天寒作字費力。寫至此。已五六停筆。此意似可念也。劉純叟時相見否。少年未諳歷。與之言。宜斟酌。恐併累舉主耳。一笑。如徐子宜。雖劇談卻不妨也。令嗣小緩之官。甚善。他祈厚爲善類護重。

某洊辱教况。不勝感慰。春來氣候不齊。醫者深戒作勞。故久不拜狀。然惓惓尊仰。則未始忘也。其病軀萎

痺雖無增損。然心閑事省。神思卻勝。前冬待坐時。但常保此。幸已多矣。欽夫之傳。極爲之驚憂。第細觀牘尾。乃二十七日。距二日已兩旬。不應江陵尙未申到。猶覲消息之不真也。元晦爲人不耐。前此屢嘗箴切之。候有便。當委曲曉譬。但不若調護。且令得祠。乃所以愛之也。

某病倦。久不得拜狀。便中伏辱手筆。下情不勝欣慰。自聞公得政。雖爲廟社生民賀。然天下之望。稱寒實難。亦私爲公憂之。翟公巽所謂。視成於牒檢者。施於薄物細故。則可耳。至於消長安危所繫。則當念茲在茲。無所不致其力。雖大臣與國同體。起福無形。消禍未萌。不汲汲於自見。苟弗替此心。善觀國者。要自知之。若有所懷而不盡。力不足而遂止。則非明主獨察於衆。訾漂搖之中。遂授以政之意也。至於虛懷盡下。以公滅私。雖公之所素期。然歐陽公每以平心自許。濮議之成。蓋在治平之前。辭氣尙有餘怒。况諸公交疏之際乎。以此知臨事之難也。張荊州聞已葬。亦嘗有數語哭之。原伯舅氏處有本。雖止敘交契。度唯公可見耳。朱元晦條具民事。而及其它。不爲中節。獨賴仁人君子共保持之耳。繼此如復求祠。若遂其請。乃所以全護之也。君舉衝暑罷歸。可念。亦是太喜事。不老成之病。遭此未必不有益耳。

某沈痼。雖非藥石所能攻。然習貫如自然。處之亦甚安適。但得廟堂之上。主張元氣。俾得與繆寡廢疾者。俱安於蓬蓽之下。志願畢矣。杜門絕不接外事。間有能誦新政之美者。意欣然欲聞之。及陳其目。乃不過計資格之毫釐。校案牘之差舛。雖未必得其真。然時難得而易失。唯覲專致力於大者遠者。以稱塞君民之望。李仲信、李修相繼逝去。乃翁其何以堪。不知曾得近問否。甚念之也。鄭自明奇禍如許。可駭可痛。渠

平行雖欠琢磨。然習俗方患軟熟。此士豈易得耶。客或道王謙仲奏對。差強人意。采葑采菲。無以下體。如房杜之持衆美。真大臣事也。舅氏將漕江東。於奉親良便。韓丈時通問。爲况甚安。朱元晦境內大歉。聞告乏於朝。或未有以周之。姑聽其去。若何。近歲書生。例多疎脫。所繫亦自不輕。非公其執念之。某杜門待盡。忽被除書。朝廷記憶收拾之意。則厚矣。病廢如許。寧有能拜命理。此公之所深悉。唯望力賜調護。早如所請。復畀祠祿。不勝幸甚。勸導調娛。忍恥以濟國事。雖前輩何以加此。但近世職無大小。多以趣過目前爲俗。眇然爲國家深計長慮。善類不敢望之。它人也。朱元晦近日曾求祠否。向時得渠書云。民間事尙可料理。最是軍糧無指擬。日夕寒心。甚爲渠憂之。不知今如何。劉子澄經年不聞問。嘲嫻。乃天資未重之病。然它山之石。可以攻玉。在此不妨有益也。某祠祿雖滿。在來春。旣經除官。舊任已罷。若從所乞。奉祠自可別給敕理任。庶幾自此兩年。免得以斗升之累。瀆廟堂耳。

某控辭曲蒙賜可。又且憫其貧病。處以帥幕。朝廷之恩意。可謂厚矣。顧自今氣體。實不堪涉道路。謁官長。已上祠請。唯公力爲調護。使蚤得之。甚幸。方歉歲。亦粗有利害也。尋常見所在謀議官。或老或病。爲妻孥驅迫而出。龍鍾蹣跚。爲衆所指笑。意每傷之。今某旣無妻妾。舍弟又能安枯淡。足可閉門養病也。貧居荒年。雖費力。然所須至不多。公若爲舍弟致一岳廟。則兄弟所得。月爲米六斛。粥飯不啻沛然矣。此特並緣廟堂記憐之厚意。聊試及之。非敢必也。丞相書中。不敢及者。以某方求祠。嫌於併干兩事耳。某奉祠得請。遂可安居。一意養疾。坏治之賜厚矣。近書新銜。譙沛真源。便如在眼中。若十年不死。嵩之崇。

福。竟之太極。華之雲臺。皆可臥遊也。此雖戲語。使四方無虞。鰥寡廢疾者。得自佚於衡茅之下。其必有所自矣。示諭再三。固所深悉。政地有人。消弭鎮定者。夫豈一端。但天下所期於公甚重。固不可汲汲自見。亦不可留時廢日。而虛其望也。韓范所遇者。平世故。猶可持循。使所處者。如諸葛武侯。危急存亡之秋。亦豈待歐蔡煎炒乎。此自公忠誠素所蓄積。亦不待於鄙言也。舍弟岳祠。既荷垂念。若早得之。於歉歲。殊有助。今以劄子拜納。江西道院記。愜當無可議。發明元祐之政。尤善。公方居黃門之地。豈徒言之而已哉。某近者。使中伏辱教賜。下情不勝慰懌。春事方興。恭惟鈞候。動止萬福。某萎痺無進退。然掩扉靜處。殊覺安適也。舍弟乞岳祠。初恐歉歲難度。今米價不增。亦粗可隨分枝拄。渠雖書癡。近卻肯管家務。不以倉庾氏爲憚矣。來諭方議省閑官。不欲拈出。甚善甚善。歷觀建隆迄今。二百餘年。在政地者多。雖德業材略。參差不齊。至於功名不終。皆由私其親舊。此段雖公天性之所安。但恐居衆求輻輳之地。會不免有屈意徇人處爾。如舍弟介僻。薄於聲利。初展緘。猶憮然悔有求之非。曉譬之。乃解。況他人乎。想見朝煎暮炒。咎責怨謗之聲。滿耳塞胸。願公堅守初志。孚上聽。服下情。消羣陰。回元氣。只繫此耳。德輶如毛。民鮮克舉之。我儀圖之。唯仲山甫舉之。愛莫助之。此所以惓惓不能已也。若如莆參。除一朱元晦館職。謂之用名士。與一曾覲爭行馬。謂之擇近習。不惟非善類。所祈於門下。亦豈公之所存哉。力疾作此。屬徐子宜呈達。他祈爲天下壽重。

近事小小節目之間。殊有慰人意處。如宰執推李仁甫修史之功。孜孜料理荒政。南康一部。蠲放殆盡。

調護必有所自。願益志其大者，真積力久，安知無陽復泰亨之理乎？元晦終更在，卽不必強牽挽之。只須與在外一等待闕，差遣爲愜。若意猶未能已，稍升等足矣。不惟遂其雅志，又免得渠懇辭紛紛耳。若異時公之志得伸，又別論也。子直庶幾善道，而於事物似未盡諳悉。如陸務觀疎放，封駁豈爲過當？方人材難得之時，其詞翰僞發，多識曲故，又趣向實不害正，推棄瑕使過之義，闕略亦何妨？公與子直厚如此，胡不素語之乎？其他非病廢者所當言，聊舉此一端耳。

與鞏太監采若

某屏居久不貢寒溫之問，第有傾向，側聞出守吳興，雖於雅志甚愜，然善類所期，政宜從容論思之地，以紓賢蘊，此殆未足以久淹遐矚也。某屏處衡門，隨分頑健，終日蕭然無它事，得以一意緝閱，但無由時扣誨益，嚮風每切依依。某少稟同年歸安承張體仁志士也，襁褓中矢怙，祖母鞠育之，以至成立，到官未幾，聞計奔歸，自陳欲解官，而郡以法令卻之，後來復乞尋醫，而前政亦未之許。某竊謂此事以迹觀之，誠似未得中行，以實論之，則其鞠育恩義，異於他人，哀恫發中，欲自伸其情，非出於矯飾，蓋仁人君子之所哀也。竊惟布政之初，方將恢崇風教，若許其從欲，以敦薄俗，其益大矣。張丞恐其情不能自達，力以見屬，某十年來作親故書，未嘗掛口及時事，茲以其意懇惻，且求退異於進，故爲破戒一言之。

與劉衡州子澄

某屏處如昨諸况，舍弟輩請見，當自能言之，更不重出。渠欲相屬請先生同過南安相聚，切告，便爲斟酌。

嚴重能教道有益子弟者。語之。庶其不荒廢也。吾兄從容侍旁。想涵養履行。日益有味。近日思得吾儕所
以不進者。只緣多喜與同臭味者處。殊欠泛觀廣接。故於物情事理。多所不察。而根本滲漏處。往往鹵莽
不見。要須力去此病。乃可相去之遠。何由會語。以究此懷。

某侍旁。相如近日。士子相過。聚學者。近三百人。時文十日一作。使之不廢而已。其間有志趣者。亦間有之。
城中相識。如新富塗。潘教授。景憲。金華。彭主簿。仲剛。皆向學甚銳。朝夕過從。頗以有益。獨恨吾兄在遠。未
嘗不悵然奉懷也。前月已令人往部中。投在外。指射文字。及託舅氏。俟有可授闕。隨分占一處也。齋中諸
公。赴廷試者。獨葉茂承。在五甲。曾嘉量。陳一之。輩。卻皆在前甲。集注罷。當歸齋中。洪求仲。往赴太學。補試
未回。皆恐欲知子充兄弟。計常相過。不知諸公如何作工夫。望一報會次。亦告各道。倦倦賓之。常得書甚
安。欲一訪之。亦以倥傯未暇。須俟秋涼耳。元晦近日亦得書。欲同作編史工夫。比亦寄條例去也。

某到官三月矣。雖於職業。不敢不勉。但學力淺薄。有愧處甚多。然行有不得者。當反求諸己。外有齟齬。必
內有窒礙。反觀內省。皆是進步處。初不敢爲時異事。殊之說。以自恕也。大人已得交割後書。當初本擬。尊
兄在郡。可以日夕啓扣。今乃大失所圖。然壤地相接。凡有所聞。千萬毋惜忠告也。蓋當官下情。最難通。又
寮屬間。可以展盡心腹者。政未易得耳。筠素易治。承應必甚優游。既在此心。隨大隨小。民受其賜。不知彼
間士人。亦有可共講學者否。善未易明。理未易察。吾儕所當兢兢者。此間幸張丈鄰。牆得以講磨。此公學
問。端的親切。而中無私主。進退不已。甚恨吾兄未得親近之也。子充無三日不往來。善願方孤。得其復留。

於正道極有助。但忌之者亦多。殊岌岌耳。

與潘侍郎 叔珍

垂諭確實詳悉。殊非泛然之論。足見進德之功。不勝降歎。大抵培養孝友。根基深厚。愛既篤。則慮自周。幾微萌芽。一一自見。懇惻勸導。蓋有不能已者。仲尼所謂忠焉能勿誨乎是也。若視之漠然不相干。或遲疑畏縮而不發。皆是於忠愛上少欠耳。既發於忠愛。則語言藹然慈祥。自無責善傷恩之病。斟酌彌縫。亦自然深淺得所。若至傷筋犯骨。只是本原未深厚。故易得鹵莽疎漏耳。

叔度見過。出示先丈誨墨。且言將爲雙林之遊。計首忽來。變出意外。驚駭悽愴。涕泗交集。然壽考康寧。集五福之全。固可無憾矣。尊兄至性純孝。創鉅痛深。曷以勝任。昔人有言。惟送死可以當大事。昆仲講學有素。必將大復古禮。以革俗習之陋。某妄意討論。朝夕朔望。奠禮納呈。恐或可資采用耳。與叔志昆仲

某官次粗遣。但無補毫髮。徒自愧耳。奠居既久。想漸成趣。解組之由。既無愧怍。身閑心安。尊幼和輯。世間之福。詎有過於此者。何必外求也。李壽翁被召。想嫠女甚惜之。然來此。殊有補第。恐其倦於應酬。憚於入都耳。孺子不知已成行否。或猶未行。告爲督趣。就道幸甚。此間甚閑暇。殊有工夫相伴讀書也。

安居想漸成趣。前日紛紛。似不必猶置胸次。回首既無甚愧怍。隨時恬養足矣。至於明辯枉直。此乃在位者之責。或遲或速。順聽之可也。

某病廢如此。遽叨恩命。萎痺無由拜受。已上章力辭。敢告朝路間。力爲道沈痼。決不能出之狀。庶幾有助。

耳。人情、法意、經旨，本是一理，豈有人情、法意、皆安，反不合經旨者耶？在勉之而已。孺子近日作舉業，卻勤亦可喜也。

比辱教，况病倦，久不得治報，坐深系仰，易地委寄，雖不輕，然於此盡心焉。流澤之遠，何止五世也。大抵公道終可倚，但人奪於目前利害，不暇深思耳。某病體只如舊，所幸無求安望愈之心，免得煩擾，日用亦自安適也。其他叔昌、昆仲，當能具道。

與魏寺丞國佐

某一病垂死，兩年來稍稍調理，飲食起居，皆不須人。雖右支萎弱，既不仕官，閉門養疾，袖手緩步，初不知疾之在亡也。以此日用間，極自適，百念灰冷，但思見君子，猶往來胸次耳。今歲辱誨墨，至於四五，愛念之篤，發於篇什，病中不敢勞心，無由磨續，然此意何可忘也。家食之久，公論甚嘖然。及此暇日，政可澄汰磨治，多閱天下之義理，以發揮世業。臨紙不勝拳拳，恐欲知卽今病狀，故力疾強作數字，腕弱不能詳布。

謝陳丞相

恭惟某官，以盛德偉望，儀刑廟堂，以闕略遠猷，開濟寰宇，精忠上達，厯澤下流，方將正元氣，以格君心，定國論，以一民聽。大本既立，萬目自張，厥惟善類之所素期，是亦輿人之所共屬。某以蕞爾之蹤，屏伏閭巷，與昆蟲草木，共游坏冶之中，涵泳泰和，爲日久矣。具瞻之地，禮絕百僚，分有常尊，賤不可瀆。士有常守，進不可輕，用是不肖之姓名，無由自達於典籤者，曠宇碩量，細大并容，草芥之微，常在原貸。

成均置屬。本待名儒。推擇之餘。下及屏陋。恍然內顧。業荒學淺。且無一日之雅於門下。果何自得此意者。大鈞播物。不間遠邇。推拔十得五之義。故雖頑鈍。猶在甄獎。深惟至公之舉。本非私德。而犬馬蛇雀。道諛不情之言。亦非承學所當施於大君子者也。惟當博親師友。砥礪講習。使不辱厥官。無爲化筆之羞而已。拳拳之誠。有如皎日。

與虞丞相

恭惟某官。以兩朝元老。四海重望。獨運大鈞。身任天下之重。主上之所注意。羣獻之所委心。皆以裁成鴻化。紹復大業。是後。闕略遠猷。固將次第而舉。謹傾耳以俟。

某晚學諛聞。自侍凡鳥。卽蒙眴睐。眷獎之厚。史觀清華。俾參末屬。政屏暇豫。時接緒言。內視疎蕪。莫知所以仰稱者。茲焉考滿改秩。祇拜命書。靖惟僥倖。實坏冶陶成之厚賜。謹當勉自講習。益求所未至。少酬知遇之萬一。惓惓此心。尙祈孚察。

某瑣微之跡。自託鑪錘。身非己有。去來出入。固當肅聽造命。不當自必。然私義迫切。用敢犯瀆尊之譴。而終布之。某親年浸高。而諸弟皆未更事。左右就養。不可遠違。前此固常控聞鈞聽。今茲冒暑遠歸。百緒皆未有條理。尤重輕去膝下。而以其勞遺老者。懇懇之誠。在所憫察。倘蒙畀以祠祿。以爲甘旨之奉。於其餘暇。溫習舊學。二三年間。稍稍就緒。自當袖書光範。求備大廈一木之用。悃悃披露。惟孚其實。而憐其情。不勝幸願。

與梁參政

恭以某官正大之學。忠嘉之謀。政路歷年。彌縫輔贊。固上格君心而下孚羣聽矣。培養元氣。統盟公道。實衆正所共期於門下者。仰恃眷知。敢以此獻。

某展布誠悃。登徹崇聽。某樸拙魯鈍。無所取材。親年浸高。諸弟皆未習事。左右就養。不可遠膝下。前此控白。雖蒙再三之誨。非不欲仰體愛存之意。一聽坏治。然內揆私計。勢不容已。而其間又有非筆墨所能盡者。仰惟高明。必能洞悉。敢望始終覆護。畀以祠祿。俾爲甘旨之奉。暇日當尋繹故業。澡澤矯揉。異時粗有毫分進益。當惟所使令。何敢自擇。謹俯伏以俟矜憫。

與趙丞相

比控悃幅。仰瀆化鈞。退惟僭瀆。方俯伏以俟訶譴。丞相始則記識不忘。意其尙可被飾。起之於病廢之中。及尅殘瘳。豈不能拜命。則又惻然憫其困窮。處之帥幕。俾得亟就厚祿。以蘇貧病。矜憐拊養之賜。至深至厚。不可稱量。願以齋然病軀。餘息如髮。雖數舍之近。亦無由與疾自致。涸轍窮途。塊坱之鈞。再三陶播。猶不能植命之奇窮。亦云極矣。祠祿雖薄。方此歉歲。月得數斛粟。在困厄中。殊有所濟。若蒙矜恤。而曲從之。幸之大者也。力疾布稟。不勝惓惓。

與王樞使

某衰病沉痾。分甘棄捐。樞使矜顧不忘。俾之復綴朝列。而筋力已愈。不能勉強。以承下風。僭易布誠。朝夕

愧懼。某官念其鉛槧之舊，憐其疴疾之餘，賜以便安，使參帥幕，自非降遇有加，委曲全就，何以及此。區區謝誠，豈筆舌所能槩見。引領黃閣，神爽飛馳。

某自惟一介么微，涖煩除書之下，相公所以記存者，厚矣。葵越相去不遠，而又職優俸厚，可以養疴，使自爲謀，豈復有過於此。苟稍可支吾拜命，豈敢復溷朝廷，實以病體支離，日事醫藥，杜門里巷，雖已再見歲窮而未敢少有衝冒，且親故相邇，可以平量服食之所宜，今舍鄉閭而去，其間不能自如者，非蓋一端。雖大府賓僚，初無吏責，然而氣之衰殘，必不能跋涉道路，動履之蹇緩，必不能勝任衣冠。苟或將護稍愆，常時則疾勢必致增益，至此然後扶曳復歸，將益動大君子之仁心矣。若蒙察其懇款之情，恕其再三之瀆，曲賜軫念，復畀以宮觀差遣，則可以專意休養，從其所安，庶幾數年之間，或可小瘳，則自今已往，皆受賜之日也。冒瀆威尊，某俯伏無任俟命之至。

與虞丞相

某近者敬裁尺書，以拜鑪錘之賜，共聞既登几格，茲焉肅奉堂帖，首在召賜之列，竊惟金鑾給劄，本待名勝第一流，墨客槧人，誇詡歆羨，或濡筆削牘，終身而不能覲，如某者，鄙樸椎鈍，絕意清貫，雖蒙瞻獎，顧憐不在人後，所以不敢崇飾固陋，卜瀆大鈞者，蓋謂與其踰涯過量，仰累權衡之明，孰若安分守常，毋爲牆仞之辱，區區惟堅微志，圖稱深知，豈謂某官度越峻軌，俎豆英游，拔之於冗散惰廢之中，收之於干祈請禱之外，雖已遠門闌，而常賜記存，不啻階阼之近，雖旁無仗助，而獨被尉薦，不待介紹之多，是某官之知

某蓋曠數十年所未見。而某之受知。亦閱千百人所未遇者也。此知此感。夫豈筆舌語言所能述哉。某官之於某。可謂真知而非苟知。則某之於某官。惟當出情語而不當爲虛語。政使所守者未必中節。所陳者未必合宜。苟不一一披露。以聽財擇。則非以拙誠事大君子之道也。某親年浸高。冒暑遠歸。所常調虞經理者。百未有緒。晨夕膝下。未可爲離鄉者。屢嘗面懇。而前書亦既開其端矣。重以所學未成。動皆迂滯。經年庠序。疎野率略。可咎可悔。處甚多。若非某官覆護全度之。其抵譴訶。已不還踵。退自循省。惟當歸就閒曠。一意爲學。淬厲矯揉。益求其所未至。苟昧於自量。輒復輕出。冒居非據。曠敗可期。容轉扶持。政恐徒費陶成之力耳。雖朝廷正大之體。用捨黜陟。柄出於上。非爲下者所敢自擇。而學者委質之義。東西南北。亦當惟命之承。格以公義。誠不當犯分以干司憲。今茲猶敢自言者。竊嘗惟念父兄之於子弟。封植栽培。弱者必養之。使至於強。虛者必養之。使至於實。愛惜長育。未嘗肯輕伐於拱把。而無益於用。此某所以竊體是心。歸誠門下。求須臾之閒。庶或可備他日之須也。倘蒙矜憐。賦以祠祿。以便其私養。以餘閒從事於講習。異時衆聽稍孚。而俾預周行。自揣稍進。而願沾化冶。固將有日。此乃真情實語。而非有一毫之飾。又况學省之召試。恩典超踰。輩流所罕。而無厭薄不屑之嫌。某之受知。肝鬲洞然。內外所悉。而無懷情不盡之畏。用敢傾竭底蘊。以聽甄鑄。上瀆威嚴。某無任俯伏俟命之至。

答潘叔昌

所諭上蔡之語。已悉。大抵爲學工夫。涵泳漸漬。玩養之久。釋然心解。平帖的確。乃爲有得。天高地厚。鳶飛

魚躍之語。恐發得太早也。德銳篤學如此。甚慰所望。有疑毋惜常批。來叔原想不廢講習。每見朋友問質。美寡過。可進此學者。亦非不多。往往溺志宴安。日復一日。其終異於常人者。無幾。蓋嘗三歎於斯。書曰。若藥弗瞑眩。厥疾不瘳。若百事安穩。無違情拂志。而可以成就。則君子當滿天下矣。惟其不然。所以貴於用心剛。而進學勇也。

答岳與言

茲承遠訪。備見志尙之確。旬日雖得款語。猶以匆匆爲恨。前此論及博議。并奧論中鄙文。此皆少年場屋所作。往往淺狹偏暗。皆不中理。若或習誦。甚誤學者。凡朋友問者。幸徧語之。所常朝夕從事者。程氏易傳。范氏唐鑑。與夫謝氏論語。胡氏春秋之類。則隨其觀者分量淺深。要皆與有益而無他弊也。他惟力學自愛。

與喬德瞻

近益知爲學工夫無窮。而向來日月虛度。爲可惜耳。切要工夫。莫如就實。深體力行。乃知此兩字甚難而有味也。

某受告後。卽以書往求祠。此段去就。本不待決。蓋非疑似可論者也。月初切早入城。比得張丈書云。有曲折託吾友面達。欲早知耳。處鄉閭親戚間。更須子細點檢。此最親切工夫也。

王子正自湖州來。秋涼乃歸。欲因整頓國朝治體。吾友數日間。便撥置爲此來。乃佳。蓋目下書院士人多

歸欲及此暇時講究。若至秋深人多。卻難得工夫也。某官次粗安。學校間事亦稍稍安堵。行有不得者。反求諸己而已。不敢他咎也。

家幹。如是不得不爲者。自當安心入細。謹確料理。不必有避就。羈絆之撓。此卻是不止其所。如是。日日常事。非斷然撥置。亦卒無了期。兩端蓋在自斟酌耳。

近來相聚諸人。比舊卻漸著實。吾友有暇。早來爲善。閑中日月亦易失也。德修時復往還否。天資美甚。更彼此實相琢磨。爲善補試得失。本自相對。想必有以處此。兩日來。獨甚念錢幾叔。憂其必鬱鬱致疾耳。中秋後。天氣涼。可以出入。是時束書見過。爲望。

與邢亦用

某自春來。爲建寧之行。與朱元晦相聚四十餘日。復同出至鵝湖。二陸及子澄諸兄。皆集。甚有講論之益。自此卻無出入。可閉戶讀書也。前書所論。甚當。近已當爲子靜詳言之。講貫通釋。乃百代爲學通法。學者緣此支離泛濫。自是人病。非是法病。見此而欲盡廢之。正是因噎廢食。然學者苟徒能言其非。而未能反己就實。悠悠汨汨。無所底止。是又適所以堅彼之自信也。尊兄試深思之。以爲何如。比來爲學。想益有條理。別紙備悉。大抵論致知。則見不可偏。論力行。則進當有序。並味此兩言。則無籠統零碎之病矣。君舉之歸。固名下難居。然亦有自愛太過之病也。

某自五月間。亡婦之喪。冒暑治喪。悲愴疲繭。殊無聊賴。祔葬甫畢。而聞張丈之出。又聞劉丈之訃。出處死

生固亦常理。然消長之勢如此。可懼可愕。以是尤覺意緒忽忽。寢食殊少味也。

某自明招入城。復至衢。婺兩境。迓大人之歸。弛擔方半月。侍傍閉戶讀書。漸覺成趣。向時過從士子。往來者不過時有三數輩耳。累求祠未報。而有召試之命。已復申前請。倘得如志。得以一意休惕。爲學。僥倖多矣。

某屏居粗遣。但憂患相仍。意緒慘愴。殊不能堪耳。邦傑已遂襄事。深爲之痛惻。志操如此。不謂其夭折也。拊育孤幼。其何以爲懷。然似聞體候亦常失調。護切告寬。抑自愛。春暖能乘興見過否。與朋友講論。固可解憂。而去家稍遠。凡百清簡。亦深有助於攝養也。汪丈棄世。殄瘁之悲。善類所同。數日間。卽走三衢哭之。次第元夕後。乃能還舍。他所以時爲遠業自愛。

與內弟曾德寬

小三、六、五、七、四弟得書。欣聞侍履勝常。前此各有官所。今皆會聚膝下。此樂無涯。讀書必漸見次第。某今年讀書。方似漸見蹊徑。方欲再將五經諸史。以次再討論一番。況如吾弟妙年無事。尤不宜虛度歲月也。小三弟欲習宏詞。此亦無害。今去試尙遠。且讀秦、漢、韓、柳、歐、曾文字。四、六、且看歐、王、東坡三集。以養本根。口總類。蓋口時文。近試半年。旋看可也。向所送筆。甚可使然。口業拙於作字。佳者政無用。若賤而易得者。後便口口十管來。爲佳。它惟以時自愛。某啓。

小三弟、七、四弟並收書欣 侍奉多勝

還膝下當甚可樂。免於事役而就閒暇。讀書亦當有味也。每思往年相聚時。爲學旣自未有工夫。而世事多未諳歷。所講論者多未當理。五六年來。方自漸知蹊徑。念欲復款曲商榷而不可得。徒慨然也。大凡人資質各有利鈍。規模各有大小。此難以一律齊。要須常不失故家氣味。所向者正。凡聖賢前輩學問操履。慕之。是謂所向者正。若隨俗輕笑。以爲世所存者實。如已雖未免有過。而不敢文飾。遮藏。又信其所當信。法不須如此。不當如此。則所向者不正矣。所當信。謂以學問操履。不如前輩爲恥。而不以官職不。而以聖賢語言前輩教戒爲必可信。恥其所當恥。如人服飾費用。不如人巧詐小數。不如人爲恥。持身謙遜而不敢虛驕。遇事省細而不敢容易。如此則雖所到或遠或近。要是君子路上人也。小三弟所說讀書件數太多。今當只看一經一史爲常課。而以詩文之類爲餘課。乃是耳。相見之日尙遠。故縷縷以代面言。他惟力學自愛。

與戴在伯

某到官垂兩月矣。其初殊有齟齬處。近日稍稍安堵。大抵坐談常覺從容。臨事常覺迫切。乃知學問工夫無窮。當益思所未至也。吾友初官。又非此比。切須柔巽和裕。而不失正。乃善。尊長所命。非甚害義。皆當曲從。然先須委曲幾諫。必不得已。然後斟酌曲從也。通家之類是也。上官招飯。則不可拘旬假要之。但守非旬假不作會。則與世俗稍通也。某所居乃在舊王承宣園。今號東百官宅。政與張丈寓舍相望。於講論甚便。行期果已定。日否。他惟力學自愛。

居官臨事。外有齟齬。必內有窒礙。蓋內外相應。毫髮不差。只有反己兩字。更無別法也。

呂東萊先生文集卷五

書

答方教授嚴州

伏蒙誨劄。教以窮理盡性之說。蓋非末學所敢擬議。然既荷開論反覆之勤。闕然不報。益重疎怠之罪。謹因來教。而紬繹之。所謂理雖無窮。然有本有原。有倫有要者。既得窮理之大旨矣。竊意。惇典庸禮。秩然而不可廢者。此其倫歟。致知格物。瞭然而不可揜者。此其要歟。未有不知其倫要。而能造其本原者也。本原既造。故小可舉大。而宏闊勝大之言。不能誘也。近可卽遠。而荒忽茫昧之說。不能惑也。一可知萬。而二本兼愛之學。不能入也。執事之所諭者。倘可以是觀之乎。未能識心。豈能存心。所以誨警者。誠爲切至。然所謂人心本虛且明。與性不殊。則猶未能達。蓋旣曰與性不殊。是心與性有殊也。幸望指教。列禦寇所謂八荒之外。來于我者。我必知之。有來于我者。又有知之者。似判然二物也。來教又謂。妍非所當愛。醜非所當惡。我非所當厚。物非所當薄。某竊謂愛惡厚薄。發之不中其節。施之不以其序。固人欲之私矣。若曰無愛無惡。無厚無薄。則非所諭也。夫子謂吾無隱乎爾。吾無行而不與二三子。則似非不顯以同衆也。至誠如神。見乎蓍龜。動乎四體。則似非假蓍龜以自晦也。荆公之書。蓋未之學。伊川論語。頗効參請。則亦未之聞也。一固萬也。不待一塵萬境。而後知其一而萬也。萬固一也。不待萬境一塵。而後知其萬而一也。千載一

念一念千載竊意竺乾之書俱不免近於辭費也。不生而現生，不滅而現滅，不生之生，不滅之滅，果固然之理邪？何爲而復加現之一辭也？執事信之篤，守之堅，豈口舌所能移？獨以屢沐誘誨，不盡白其愆，則無以拜盛意之辱，尙幸原恕。

與內兄曾提刑致虛

臨安之別已復踰月，下情日深企仰。科場得失猶探籌耳，彼此俱不足言。示諭葉舜臣姻事，舜臣舊同舍與之極熟，其修學作文種種加人數等，資性和易而臨事有守，往年初登科，朱丞相欲議親，堅拒不可，其有特操如此。此某之所見者也。若南北之異俗，家費之貧富，姑舅之寬嚴，此某之所不見者也。舜臣書謹納去，更告參考詢問，若果無疑，則附書去可也。至於奩具之豐約，舜臣豈論奩具者哉？聞浙西之行，近在旦夕，向寒道塗間不無勞動，景昭獲薦可喜，因見爲道千萬意。

某官次粗遣，疎野有素，在酬酢應接之地，殊非所宜耳。尊兄從容侍旁，講學當有新功，但切磋琢磨，須要益友，不知過從中亦不乏人否？秀州奉板輿，逼歲西渡，且宿留禹跡，俟暄和乃之永嘉，永嘉荒甚，極費料理，猶賴朝廷燭知本末，卻肯應副，恐可下手也。數日來無新報，都漕旣罷，民力當小寬，但浙西江東，歉處極多，殊可慮也。提舉位子弟能自立否？如可告語，切力勉之爲學，扶樹門閥，此最急務。卽今三衢諸位上承下接，左摩右拊，其責唯在尊兄一人而已。此惓惓不能無望也。學中得芮丈，留爲祭酒，士子之中，近日亦頗有嚮學者矣。

某到官累月碌碌無補。祇益自愧。日來如鄭自明除官。祝汝昭鼓復之類。皆似有陽生之漸。但意思易得。斷續耳。三館在昔固議論之地。但近歲沿襲。殆如宮觀。古廟破例輕發。徒成強聒。媿惰苟容。又負初心。殊未知所處也。區區所懷。要非面見。莫能展布。

使中伏領手誨。具審視事之初。諸况安穩。不勝欣慰。大府當不乏游從。幕中雖時有合斟酌之處。要是清簡。非州縣比也。陳伯任平實可親。向來君舉在福唐。極有意接納。聞陳伯任往還卻踈。使君舉坐間皆此客。流言何自而起哉。初哥字序。以病中未欲勞心。它時粗有情緒。當下筆也。然學者以務實躬行爲本。語言枝葉。政自不急耳。

與王待講齊賢

郡政恢舉。想綽有餘裕。前此整齊汎掃。非用嚴固無以濟。今威令既行。綱紀既立。則慈祥樂易之意。教化漸摩之本。宜次第出之。使封內識吾之本心。此高明所自了。蒙下問之及。不敢不竭其愚耳。

自聞入覲。有日。預深遯遠之恨。早承訪別。既不果迎。而憂石闔門。又不克追路語。雖惓惓此心。積鬱莫展。鋒車之行。治表繫焉。淳蓄之厚。綜練之精。培元氣而扶正論。必將本末具舉。願益勉之。以答善類之望。天向寒陟降川陸。敢以慈護爲請。

與張運使宗尹

余解元見過。出示手教。慰藉優渥。祇誦再三。以愧以感。下車許時。條教既孚。當漸不費區處。在我者。既無

遺憾。政使或有未退聽者。蓋亦自有公論。唯覬毋廢初心。使斯民益被實惠。是所願望。旆從入郡。當在何時。傾耳車音。以日爲歲。

請遠五閱月。而咫尺之書。不到籤室。坐懶故爾。奉告。共審即日暑雨溽蒸。鳴弦靜治。台候神相萬福。某迫行。百冗紛然。應接不暇。它無足言者。政聲藹然。奸戢惠孚。甚休甚休。素恃眷愛。區區竊有欲布陳者。輒具別紙。雖愚昧。豈足贊采取。亦姑盡其拙誠而已。它唯若時珍護。前拜召節。

大猷旣擒。威信自此行於一邑。凡事必易。然要當遇事平心。無先懷抑強扶弱之意。唯視理之所在而已。雖常攻擊縣道者。苟其事理直。卻須右助之。則人服我之公。

財賦當催者。恐當加意督趣。令整辦。尋常士大夫或誤認弛縱爲恤民。殊不知不及時拘催。使民間拖欠積壓。異時忽遇苛刻之吏。一併趣辦。則民受大害矣。

與陳君舉

謹思明辯。最爲急務。自昔所見少差。流弊無窮者。往往皆高明之士也。

近思爲學。必須於平日氣稟資質上驗之。如滯固者疏通。顧慮者坦蕩。智巧者易直。苟未如此轉變。要是未得力耳。

在我者。果無徇外之心。其發必有力而不可禦。至於周旋調護。宛轉入細。政是意篤見明。於本分條路。略無虧欠。若有避就回互籠絡之心。乃是私意。彼此以私意相角。一口豈能勝衆舌乎。此臺釐之際。不可不

精察也。

要須公平觀理。而撤戶牖之小。嚴敬持身。而戒防範之踰。周密而非發於避就。精察而不安於小成。凡此病痛。皆吾儕彼此所素共點檢者耳。義理無窮。才智有限。非全放下。終難淡泊。然放下。政自非易事也。培養克治。殊不可緩。私意之根。若尙有眇忽未去。異日遇事接物。助發滋養。使張皇不可剪截。其害非特一身也。要須著實省察。令毫髮不留。乃善。

公私之辨。尤須精察。

昔者歐范余尹之去。韓稚圭袖手於其間。又爲諫官。於旬日之後。亦未嘗皦然暴白。從容調娛。迄用有濟。前輩非無此樣轍。然此段實難。必須沉厚堅實。六轡在手。操縱伸縮。無所差失。目前人不得加恩。他時人無所歸怨。乃可。

喜事則方寸不凝定。故擇義不精。衛生不謹。

要當共講其遠者。大者。使異日天下受其賜。至於目前事。正其綱領足矣。

與陳同甫

今日早在學中奉候。政劇延佇。伏蒙封示孟子提要。謹當細觀深考。卻得一一請教。年來甚苦。共爲此學者。寥落。索居蔽蒙。日以自懼。今得兄坐進於此。遂有咨訪切磨之益。喜不自勝。苟心有所未安。未達。當往復論辨。蓋彼此皆己事。不敢爲鬲上語也。

某茲被給札之命。自惟疎遠。荷上記識。况小臣又無辭避之理。但前此求祠未報。聞命卽行。則非進退之義。故復申前請。若得俞允。則可一意爲學。其益甚大。苟不獲命。則亦須勉強一出。第學力未到。又復酬酢驅馳。終恐不能久安也。薛士龍願見甚久。又不知不參商否。要齋銘當作數語。掛名齋中。但亦須行止既定。有暇乃可下筆。爾約酒之喻甚切。前此汎接之久。政當深局固鑄。乃可耳。人回略此附問。第恐此書到。尊兄已離輦下。故所欲言者。皆不能盡。併留面剖也。它唯爲遠業厚自愛。

膠擾亦少暇日耳。初意開歲便可會衆。今乃知尙在中春。治疊少暇。亟命駕是望。永康亦有同志可以共講貫者否。君舉相聚數日。近方還永嘉也。孟子說復歸文府。其間所欲講論者。併留面議也。此間士子相接者甚多。但志趣堅確。規摹開廣。蹈履淳篤者。殊不多見耳。冗甚。略此治報。它唯厚爲遠業加重。

前日人還。匆匆作答。殊不究盡。洊沐手筆。從審寒暄不齊。尊候萬福。某倚廬待盡。無足言者。論事錄。前此固知來意。但某竊謂。若實有意爲學者。自應本末並舉。若有體而無用。則所謂體者。必參差鹵莽無疑也。特地拈出。卻似有不足則夸之病。如歐陽永叔喜談政事之比。所舉邊事軍法。亦聊舉此數字。以見其餘。固知其不止此也。然此書若出於學者。亦不爲無益。但氣象未宏裕耳。經世之名。却不若論事之質也。橫渠之學。恐不必立一語指名之易。見令人校對。來論謂世間事不可作意。此語誠然。吾曹要須深體之。非止爲一書設也。歐文建本所刊明用。原弊兵儲塞垣。本論下。本論止有兩篇建本中篇乃下知前輩謂非歐公文。恐欲知跋語引策問意思。甚有味。說神宗介甫處。語言欠婉。鄙意欲稍增損云。荆國王文公。得乘其間而執之。

以霸者功利之說飾以三代之文。正百官。定職業。修兵民。制國用。興學校。百度交舉。而其實有管晏之所不道。神宗皇帝睿知濬。察其非真。退之於鍾山。九年不召。然天下稍驚於功利。而不可禁。學者又習。止天下不復道矣。神宗蓋益厭之。疆事方興。未遑改作。此子瞻之所謂深悲而屢歎也。又科舉之文。猶有宣政之遺風。語亦太勁。欲增損云。科舉之文。猶未還慶歷嘉祐之盛。人以誠意來。止安得行吾私於其間哉。此語頗似有病。刪此數句。文章亦相接。蓋處大事者必至公。血誠相期。然後有濟。若不能察人之情。而輕受事任。或雖知其非誠。而將就借以集事。到得結局。其弊不可勝言。惟當肩處中者。翁受敷施。乃可用此說。然亦當知斟酌淺深。此又非范公當時地位也。所謂吾知國事而已。安得行吾私於其間哉。私本不當有。若云不行。已是第二義。若又云以國事而不得行吾私。又是第三、第四義也。固知此語是談治道者常話。然吾曹講論。政當剷除根源。不可留毫髮之病。非欲爲高論也。所以縷縷者。非爲此跋。蓋爲有意斯世者。多於此處蹉過。往往失脚耳。此段話更有非書能盡者。尋常兩家多各持門戶。少得平實之論。更埃面講。乃盡。雖范忠宣猶不能以知之。欲增損云。雖范忠宣始猶未盡知之。蓋觀忠宣元祐紹聖之際。則深知此理矣。所以不欲斷定也。委曲之教。極見誠意。自此謹當奉教。向來亦非有所回互。但與世酬酢之久。雖與故舊書。有時下筆多慣耳。

前日因回便上狀。計已呈徹。洊辱教况。暨易傳。楊氏中庸。不勝感刻。秋暑未艾。伏惟尊候萬福。某哀苦如昨。比遣人弔士龍。昨日方回。其子又臥病孱弱。未能支持葬地。君舉諸公。方料理尙未得入手。可念可念。本欲作數語。又喪制。且情緒不佳。無緣可措辭。埃服除不死。當爲之本擬來歲。嘗川。莆田。各致幾字。今遂

并與永嘉而三矣。可痛可痛。易傳看得猶有一兩字誤。已屬潘叔度校讎。續送去改正。正源錄序中說橫渠二程比孔孟頗似。斷定北宮黝孟施舍優劣。一語可了。孟子必欲擬曾子子夏。乃曰二子之勇未知其孰賢。此意可見。又所謂知崇禮卑之學一語。亦尙合商量。論事錄。此意思甚好。但卻似汲汲拈出。未甚宏裕。昔嘗讀明道行狀及門人敘述至末後邢和叔一段。方始縷縷說邊事軍法。向上諸公會無一辭及之。恐亦有說。高明爲如何。來人索書甚急。不暇詳悉。旦夕別尋便上狀。後月家叔葬事。當到山間。是時若有暇。當拜約矣。他惟以時自愛。

示及近作。展玩數過。不能釋手。如鄧耿贊斷句抑揚有餘味。蓋得太史公筆法。武侯贊拈出許靖康成事。尤有補於世教。獨陳思王贊。舊於河汾之論。每未敢以爲安。當更思之。章何兩祭文。奇作也。廣惠祈雨文。駸駸東坡在。鳳翔時風氣。跋喻季直文編。語固佳。但起頭數句。前輩似不曾如此道定。或云以予所聞者。幾人或云予所知者。幾人衆不可蓋故也。所見如此。未知中否。恃愛忘之厚。不敢不盡耳。更有一說。詞章古人所不廢。然德盛仁熟。居然高深。與作之使高。濬之使深者。則有間矣。以吾兄之高明。願更留意於此。幸甚。編史及春秋論。俟有到明招之期。當預相約。庶得面論。舊編復納去。薛士龍過此。留半月。徐居厚來。此留十日。皆極款。士龍歷此一番。履險知難。與向時不同。途中曾相見否。居厚極有立作。士人中殊難得也。長沙張丈。比累得書。平實有味。歉然益知工夫之無窮。往年豪氣。殊覺銷落。朱元晦以召命益峻。秋涼欲上道。且云至衢。婺少留。引疾俟命。皆恐欲知。易傳再刊。甚有益於學者。講下二子史評。皆俊秀可喜。甚

欲一見也。

專介辱示字。不勝感慰。秋色日深。伏惟尊候萬福。某居山間。甚安穩。但前月下旬。以葉丞相歸。略入城見之。尋卽還山。他無可言者。令叔祖襄奉畢事。想辦護良勞。文中子序引。此意久無人知之。第其間頗有抑揚過當處。如云。荀、楊不足勝。又云。孔、孟之皇皇。蓋迫於此矣。又云。續經之作。孔氏之志也。世胡足以知之哉。此類恐更須斟酌。蓋荀、楊雖未盡知統記。謂之不足勝。則處之太卑。孔、孟之皇皇。畏天命而修天職也。迫字亦似未穩。續經之意。世誠不足以知之。但仲淹忽得之於久絕之中。自任者。不免失之過高。此意亦當說破也。某又以爲論次筆削。遂定爲王氏正書。蓋非易事。少遼緩之。爲善序引。亦未敢以示人也。某此月內須謀拜見。悃悃當竣。面盡亦欲細觀類次之意也。它乞以時自重。

伏辱誨字。共審秋清尊候萬福。某哀苦固無生意。而私門不幸。八家叔竟不起疾。追痛摧傷。肝肺潰裂。家叔平生志氣材具。百未一試。而遽奪之。此痛不特爲門戶惜也。涕泪未收。而永嘉復報士龍之訃。海內遂失此人。可痛可痛。春間猶幸相聚半月。語連日夜。所欲相與肄習者。布置甚長。渠亦不謂遽至此也。比專遣人弔之。尙未回。其子雖孱弱。然志操卻可保。逝者已矣。講葺維持。政存者之責。此則吾徒所當共勉。前月末。略到山間。爲家叔料理葬事。以冗甚。故不奉報。向來與觀近製。如鄧仲華贊。蓋以識此意者少。非爲辭藻之工。其它亦隨筆偶及之耳。此固非所以共相期者也。其高不在文字。此語誠然。然登高自下。發足政在下學處。往往磊落之士。以爲鈍滯細碎而不精察耳。朱元晦近遣其子來此讀書。頗知其啓處之

詳日用間地步亦自寬展。前此傳聞者蓋多過也。易傳雖未領。然城中亦有人得本。甚便道路間。但某意謂前列語錄頗似未安。蓋此書本非借助於外者。試更思之。他祈厚爲遠業自愛。

日者襄奉遠勤慰奠。重以妙語賁飾泉壤。此意厚矣。荒頓迷錯。悼心失圖。匆匆竟不得款語。迨今歉然也。秋有餘暑。伏惟下帷授業。尊候萬福。某負土冢次日與死鄰。追念去歲今日。方迎見親輿衢。婺之間未及一年。目前竟果如此。憂極成醉。忽若向來無恙時。猶欲修溫清。事引衣。顧見篋經。乃知身是罪逆。失聲長號。往往一慟欲絕也。哀苦之餘。原省己事。大抵十八九不中理。方欲洗濯其心。深求其所未至。但所欠者朋友切磨之助耳。吾兄保社。今莫已就條理否。後生可畏。就其中收拾得一二人。殊非小補。要須帥之以正。開之以漸。先醇厚篤實。而後辨慧敏銳。則歲晏刈穫必有倍收。然此自吾兄所自了。固亦不待多言也。某更十數日。工役斷手。卻復還城中。九月末復來課督種殖。是時書院中或有暇。能撥置過訪。爲十日款否。君舉諸公。春夏間皆先後來唁。但哀苦中不暇晤語。君舉亦有乘輿命駕之約。但遲速未可前期也。偶有便介。略此敘謝。窮山中旋假紙墨。殊不知禮。想辱情炤。凶衰不祥。不敢敬致尊公問。它惟厚爲遠業自重。

前日自建康還舍。得五月間教賜。昨日又辱手字。殊以感慰。夏末極暑。伏惟尊候萬福。某留建寧。凡兩月餘。復同朱元晦至鵝湖。與二陸及劉子澄諸公相聚切磋。甚覺有益。元晦英邁剛明。而工夫就實入細。殊未可量。子靜亦堅實有力。但欠開闊耳。三國紀年序引及諸贊。乍歸冗甚。未暇深考。亦有兩三處先欲商

量紀年冠以甲子而並列三國之年。此例甚當。既是並列則不必云合而附之。魏書天下不可無正也。序引下文亦云。魏終不足以正天下。則其初亦不必與之也。魏實代漢。以法紀之。蜀實有紀。不紀以法。未知如何。是以法紀。如何是不以法紀。更望詳見論。魏詔疏有志。不知其體製如何。蜀條章不爲書。詔疏不爲志。未成其爲天下。亦恐未安。蜀固未盡備王者之制。而條章可見者。恐亦須書。自先主孔明之心言之。固非以蜀爲成。然自論次者言之。則其續漢之義。亦不可不伸也。其餘俟稍定詳請。續得商榷。昨日亦到郡齋。來諭所欲言者。皆詳及矣。人回略此布問。它祈節抑自愛。秋深至明招當圖款教。

近游領手誨。展玩再三。問闊之懷。爲之少釋。第初聞爲參學計。今乃知以營葬輟行。晤語之期尙遠。殊悵然耳。卽日霜晴。伏惟承顏之餘。尊候萬福。某官次粗遣。但碌碌衆中。略無補報。每負愧恐。雖羣索居。殊不見有進益。獨周洪道。薛士龍。時往還。君舉尙未來。天民相見亦疎也。示諭銘誌。淺薄本不足以發揚潛德。然游處之久。其何敢辭。俟天民送到行狀。卽當下手。齋銘亦當併納。次周丈三兩日。偶未相見。俟見卽道盛意也。里居游從者爲誰。亦時有論著否。他祈厚爲遠業崇護。

陸子壽前此數日已行。極務實有工夫。可敬也。

近因永康邑中人回。附問必已到几格。專介又辱手誨。雪梨之况。初冬霜寒。伏惟尊候。動止萬福。某官次粗遣。但以獨處。益復鮮况。適當天民君舉相繼引去之後。又不欲成羣隊。只得癡坐靜待而已。天民君舉於私計極便。但恐天民規摹散漫。未必能爲求田問舍計耳。三啓一誌。展玩歎賞不已。然議論斷絕之久。

領解者必少也。知安居定志。日就平實。此政惓惓所系望者。甚休甚休。居厚一病。聞甚殆。知已平復。但渠須是調伏得性氣一段。然後養生處世。方少齟齬。不然。憂未艾也。正則憂居。曾得消息否。偶今日料理過局文字。而來介索書甚急。草草作此。他惟爲遠業珍齋。

長樂匆匆別去。迨今懷仰。辱手示。知旦夕入城。晤見甚近。欣慰不勝言。卽日秋暑。伏惟尊候萬福。某屏居粗安。長樂與鄭丈夜話頗詳。亦恨所懷未能十分展盡耳。所諭隨高低說話之病。自省亦誠有之。蓋尋常與朋友講論。每欲俟其意到乃發。故多有將護之病。自此當力除之。但習慣已久。亦時不自覺耳。五銘奇甚。林公材者。尤妙。所謂令人欲焚筆硯也。但胡氏志序。其失意於姑。自責之辭太重。更令小輕爲佳。天民數日前自作一啟。亦可用。今吾兄前所送來者。首尾已善。今次所送者。尙未見之。但中間頌德處。恐人以爲輕。卻參用天民自作者。乃穩耳。他悉俟面布。

前月小舍弟不幸。特辱慰唁。不勝悲感。繼又辱教字。以方在明招營葬。故皆不得拜答。必蒙恕悉。便介又領誨字。從審晴寒。尊候萬福。前月相別後一日。小舍弟疾勢頓變。遂以不救。此弟生而痼疾。先人尤憐念之。今竟不能全。追痛摧慟。生意殆盡。近方還舍。擾擾猶未定也。政欲一得晤語。以釋鬱陶。承許見過。幸甚。所欲言者。悉俟面道。胡明仲通鑑論。先附一册去。所謂多其父兄遺論。蓋誠如此。然其間亦自有佳處。至於卓然自見於諸儒之表。則非命世之材。莫之能固。不可以此例之也。天民五日離此。徑往新昌會葬。買田之約。後來語意。又似轉移。再三與之言。方始論定。又不知他時果堅確否。景元始一再相見。亦以在郡。

齋不欲頻出也。

三先生論事錄、禮書補遺、及本政書、續刊已了者、入城幸各攜一帙來。蓋朱元晦累書欲得之也。伊川簡、叔昌猶尋未見也。

專人至辱手字。及溫柑海物之况。審聞行李。至自永嘉。雖未卽晤語。然伸紙疾讀。馳系之心。亦以少解。卽日陰晴不常。伏惟尊候萬福。某近以家婦之葬。前月未方還城中。而且夕韓丈經從。又須略出迓之。過是又欲稍休。愒永嘉之行。勢須及秋也。諸公相聚。彼此想互有發明。君舉缺在何時。所謂止爲學官。則無一事。此語深有味。豈特於君舉分上。切中其病。嘗折肱者。尤覺有益耳。然知之非艱。亦望少致意於斯也。知與象先款語甚善。前此政慮或不甚款耳。士龍所學。固不止於所著書。但終尙有合商量處耳。正則且得有噉飯處。去歲相聚。覺得其慨然有意。若到鴈山。必須過存之也。所欲言者甚多。不欲滯來介。尙俟後便。浙西之行。莫只在四月間否。後此則極暑。非跋涉之時也。它惟爲道義厚愛。

比曾秀才見過。出示字。方欲治報。茲奉手筆。從審冬暖。尊候萬福。某哀苦待盡。無足言者。比亦聞有意外少撓。要是自反進德之階。來論不忘惕厲。政所望者。更願益加培養。爲幸。昔人謂天下之寶。當爲天下愛之。此言可念也。某十二月二十後。定到墳山。文字當攜行。它俟面道也。

叔度已爲道來意。曹子亦老成。但渠欲求館。以素不預事。不能如其意耳。薛士龍數得書。郡事亦漸有緒矣。

分手又已四五十日。以差入殿廡。久不得作書。區區惟切馳仰。卽日初夏微暑。伏惟尊候萬福。某官次粗安。但沉浮無補。祇自愧耳。乍歸田間。徜徉常有佳處。卷舒出處。蓋自有所繫在我者。政自綽綽有餘裕也。廷對四方。極有忠言。大抵皆在甲乙科。既經乙覽。惟就前五名中。略加次第。其餘悉仍有司之舊。容納如此。甚盛德也。但如德遠少望。乃復漏落。世間事。往往盡難滿足人意耳。今因少望經從。略此問訊。它惟爲遠大業。厚自葆毓。

人至。辱示字。欣審秋晚氣清。尊候萬福。某官次粗遣。一向沉迷書冊中。它無所預。雖粗可藏拙。但冗食極不遑安耳。垂諭備悉雅意。再三玩擇。辭氣平和。殊少感慨悲壯之意。極以爲喜。驅山塞海。未足爲勇。惟斂收不可斂之氣。伏槽安流。乃真有力者也。吳益恭以其尊人不忍相捨。來乞祠。已得請矣。劉共甫下世。此公實繫輕重。遺奏惓惓。殊可念也。陳應求尙辭免。未來。朱元晦得南康見次。未知肯起否。石天民日來蹤跡。爲人搖撼。方求去。勢須得請。君舉卻少安。韓丈再臨舊治。諸事必妥帖。所當言者。旣已言之。但恐言輕。不能有所軒輊爾。人回。匆匆作此。它祈厚爲道義護愛。

近鞏仲至行。嘗拜書。及紙五十番。當已到几格。徐子義來。辱手字。欣審冬令晏溫。尊候萬福。某碌碌竊食如昔。無足云者。里居爲况。必甚適。閒便欲爲陶朱公調度。此固足少舒逸氣。但田間雖曰紳縮自如。然治生之意太必。則與俗交涉。敗人意處亦多。久當自知之。特契愛之厚。不敢不盡誠也。陽羨之行。在何時。日望經從相聚。今旣超然在利害之外。雖甚款曲。無復嫌忌。非如前日場屋狹徑窘步也。徐子義云。明日有

人行詳以此紙問起居筆十枝偕往。它惟爲遠業自厚。

前此幸得款聚。歸塗亟欲投宿壽山。故不得復見。殊歉然也。辱手教。恭審劇暑。孝履支持。某歸後十餘日。卽爲三衢之行。往返兩旬。汪丈靜閱之久。論事益深穩綜練。因知經歷信不可不多也。示諭藹然忠厚。有以知別後進德之深。微指固已深佩。第衰退之人。惟當閉門反己。著實以求。所未至。然此心則不敢忘也。未往三衢時。吳益恭得半日款語。語間極稱葉蔚宗之爲人。尊兄同里閭。亦知其人否。益恭亦甚以不得一見爲恨也。此月旦日。自三衢歸。陸子靜已相待累日。又留七八日。昨日始行。篤實淳直。工夫甚有力。朋游間未易多得。渠云雖未相見識。每見吾兄文字。開闊軒翥。甚欲得相聚。覺其意勤甚。渠非論文者也。人回略此上布。它祈厚爲遠業節抑。

便介辱手示。區區不勝感懌。卽日極暑。伏惟孝履支持。某碌碌如昨。近屬舅氏曾仲躬爲求祠祿。幸已得之。遂可專意讀書。殊以爲幸。前書所論固深識之。比嘗患子子小諒者。或畏避太甚。而善意無人承領。遂至消歇。或隔限太嚴。而豪俊無以自容。遂至飛揚。惟篤於忠厚者。視世間盎然。無非生意。故能導迎淑氣。扶養善端。蓋非概以爲近厚語言也。第向者言之略耳。然於此蓋有則焉。又須精察。不可侵過也。薛士龍墓誌。以畏暑作未成。所論行狀極切當。祭文皆肝鬲語也。策問當詳讀。人回甚速。略此上布。它祈節哀自愛。

伏被手况。及正則書信。具審邇日視履之詳。殊以欣慰。某病體只如舊。昨日已拜祠官之命。自此遂奠枕。

矣。四銘皆妙。而喻夫人志。范蔚宗所謂筆勢縱放。實天下之奇作也。易春秋。周禮。恨未得卽聽教。記得世說載何次道學佛。阮思曠語之曰。卿志大宇宙。勇邁終古。何曰。卿今日何故忽見推。阮曰。我圖數千戶郡。尙不能得。卿乃圖作佛。不亦大乎。疾病呻吟之餘。方課諸弟辨蟲魚。讀箋註。而兄橫飛直上。凌厲千載之表。真可謂大矣。聊發一笑。手倦不能多作字。悉留面言。惟早命駕爲望。

伏被手教。具審歸自天台。陟降安穩。極以爲慰。兩詞興寄所屬。固深感歎。第兀然枯木朽株。豈知有所謂春光秋色耶。某病勢只如舊。都無增損。近蒙朝廷記識不忘。使還故官。廢痼何由可動。尋以實控告。旣得請矣。但文字猶未到耳。甚渴一見。得暇能命駕否。城隅窮巷。落葉滿庭。亦無異游山也。手弱不能多及。悉留面布。

舍弟蒙問念感甚。渠近挈其婦往會稽歸寧矣。士龍誌銘以行役擾擾。未曾下筆。數日間少定。當屬藁。近得君舉書云。吾兄擲行狀中數處極當。便中告批示。欲得知也。

伏辱手况。具審歸自永嘉。川陸安穩。極以爲慰。正則書及墓刻。已收。相聚計甚樂。景元廓落。自其所長。區區所望於渠者。政欲其愛養氣血。點檢細行。以待時而已。腕弱不能作書。因便幸爲達此意也。陳益之留意禮學。甚善。蔡行之。有安齊之志。可惜不拈出一培繫之。梅雨後。千萬見過。爲十日款。今年緣絕口不說時文。門前絕少人跡。竹樹環合。大似山間。若得復聽快論。則石橋龍湫。不必遠求也。病體萎痺。雖已成沈痼。而目力心力。反勝往時。造物之見賜厚矣。自餘悉俟面究。

今日聞劉共甫消息不佳令人作惡殆廢寢食也

答王道夫

辱手字藥物具聞近况之詳極以爲慰。視事旣久閱歷浸廣遠業必日昌。惟韜斂光芒而致詳朱墨細碎之間慶歷嘉祐諸老由此其選也。同甫居鄉無聊甚可念。手倦不能多作字。只今病勢除把筆及登高外。其它皆如常時。不須軫念。

答項平甫

某往歲侍郎舅氏自荆南歸。其道左右年雖少而志操堅正。下至諸表弟人人敬慕。是時慨然有願見之意。今春聞分教山陰。相距雖不遠。又以病廢無從會面。爲恨。便中忽奉手筆。所以見屬者。雖非衰惰之所敢當。然詳味辭氣懇切質實。益知所存之不苟也。自張丈去世之後。至今心折。左右游從旣久。講釋必甚精詳。然願深思力踐。體衣錦尙綱之義。卑以自牧。馴致充實光大之地。則吾道之幸。石天民、沈叔晦諸兄莫能款聚否。萎痺不能多作字。秋暑以時自重。

答周允升

深居里中。日必有新益。所謂散漫歇滅。蓋學者同病。而操存體驗之要。近歲師友間講之亦甚詳。往往病猶自若者。正是實下手處欠工夫耳。常記胡文定有語云。但持敬到十年。自別。此言殊有味。大抵目前學者。用工甫及旬月。未見涯涘。則已逡巡退卻。不復自信。久大德業。何自而成。經訓所載。若曰。念終始。典於

學厥德修罔覺若曰冥升利於不息之貞若曰仁者先難而後獲正謂學者多端顧慮者衆一意勇往者少故每惓惓於此也

答潘叔度

但完養思慮涵泳義理日用間不須著意要坐卽坐要立卽立凡事如常便是完養若有意完養則是添一重公案矣覺有忿戾始須銷平覺有凝滯始須開豁病至則服藥不必預安排也涵泳義理本所以完養思慮政恐舊疾易作自涵泳而入於研索自研索而入於執著或反爲累耳陶靖節不求甚解雖其淺深未可知要是不尋枝摘葉也

前日在學中方校試卷忽候兵報行李亟歸莫知其詳不勝憂疑亟呼僮追路至浮橋則已不及比揭榜還舍乃審年家丈奄至大故變出意外悲駭傷痛逮今越宿寢食不寧年兄純孝篤至驟罹鉅痛曷以堪處然毀不滅性禮經所戒兼古今人氣稟厚薄亦自不同如疏食水飲之類更當量體力所宜不可便致疾病殊非守身之孝也仁人之事親如事天一毫不用其極則非事天之道如昔人薦芟之類皆以私事親而非以天事親也喪禮廢弛已久振而復之當自昆仲始大殮以前禮數恐無及今且討論大殮以後朝夕朔望奠禮數已封在叔至兄書中若曰親族未安習俗未喻則向日固嘗共講滕文公問喪一章矣蓋在己而不在人也此禮節目兩日來與張守同議頗似穩當或有未安批諭可也然講論喪事初無害以後禮數見今逐日討論當續報云溫公書儀大略皆善熱看爲佳最是喪服不可不如式張守甚惜年兄之去元晦旣以憂制不

可出。而年兄又復以憂去。信講學之日難得也。

銘誌之屬。本非所敢當。第以平時荷年家丈知遇之厚。不敢不盡拙誠。張丈於年兄。意極拳拳。欲渠書甚不難。但更徐思義理之所安。卻奉報也。所以欲思者。蓋以未相識故也。喪禮政當子細講究。乃居喪所當自盡者也。勝於

誦佛經多矣。若因此討論。使古禮再明。豈細事哉。叔昌亦常同講究。要須先識禮意。行實須削去浮華。直

書事實。若有增飾。則心已不誠。非所謂事親如事天也。壺範張丈甚愛此書。欲便刊板。恐後月半編集可

畢。今所欠者。最是楊龜山三經義辨切要。而嚴州徧借無本。年兄或有之。因使附來爲佳。易只依次序。不

此乃張丈之意。此說甚長也。近得劉賓之。周子充書。皆以不得在此間爲恨。此間亦以二公及年兄不在此爲恨也。

葬地已尋得否。在古禮。旣葬而卒哭。百日而謂之卒哭。乃近世傳習之誤。非禮也。數日來深思。今人所謂

觸礙掣肘。不得專制之語。最爲害事。蓋遇事望風。以此等語言自恕。則因循苟且。無一事可爲矣。要當反

己盡誠竭力以感動之。是心人所均有也。誠於此者。旣至彼。安有不動者乎。彼之未動。乃在我誠未至之

明證也。葬儀中鐘磬之屬。用綵亭。亦不甚失本意。憂患中最是進德處。深味自致之語。識性情之極。而以

哀敬持之。則心之本體。斯常存矣。道學衰微。實有意此學者。萬無一二。此區區深所望於年兄者也。喪禮

廢墜已久。切告於叔昌以次。同講論今古之宜。再復尤幸。諸史中儀喪禮服。制處皆當抄出。行實俟後月初大人歸。娶當

屏置餘事。專爲措思。識慮之所及。不敢不盡。但慮所見或差。不足以盡顯揚之志。俟具藁當先錄呈。有未

安處。卻望一一批示。切不須拘形跡也。書丹事。向嘗托唐蘊。則面道曲折。旣而再三思之。終覺未安。在銘

書丹其次也。以此覺發語爲難。蓋事親不當待外。樂得賢者發揮。以垂不朽。固與希勢慕權者不同。然其張守固無形跡。但終覺未安耳。蓋事親不當待外。樂得賢者發揮。以垂不朽。固與希勢慕權者不同。然其爲待外一也。年兄更試思之。有疑卻以見報。吉州有劉德循。循之者。去歲從劉子澄游。子澄以書相導。來此爲學。專一樸實。甚可望。又欲自此求朱元晦。其志殆未易量也。喬德瞻爲學甚進。讀書亦殊有味。輩流中甚難得也。魏純夫招令授句讀。甚得人。但錄示令嗣課程。每日念三經。各四百字。不爲少矣。更須量其力。令有餘。乃善。其他如誦儀禮。溫伊川諸書。數項姑爲減去。汪聖錫。以三上書論發達。非其人言。不從而去。去就甚合義。極爲之喜。蓋又全得此一人。非細事也。一月前有一士大夫經由此。某因語次。偶及年兄專意正學。乃憮然以爲疑。世俗未相知。固不足論。所以及之者。恐可助省察警厲之功耳。

某官次粗安。此間諸事。及所欲言者。皆略具前書矣。魏純夫教諸幼。甚得人。令嗣聯名於安叔位。有妨。誠當更易。款曲商量可也。事實去取。俟商量定。乃錄呈。行狀中有小小未當。卻無害。蓋非傳後之書也。年兄他時通張守書次。先再三謝其屢存問之意。然後及所懇序。當然也。燒丹事。適以問張守。乃翟倅閣中病於蘭谿。醫者燒丹。張守之內亦虛怯。故附燒一兩耳。傳聞過實。乃如是。然益知居人觀瞻之地。尤須事事警省。渠甚感年兄見愛之意也。此間應接之不暇。乃緣編壺範。及大人到。隨分有所謂書尺之類。非因諸生課程也。壺範。張守小女皆誦。旦夕當據已刊者。印數十板去。恐令女令嗣。亦要誦也。葬地恐不可緩。但得深穩高燥。不必求太備也。緩葬春秋所深譏。博求廣問。恐無不得之理。唯須略去拘忌。乃易就耳。書丹。張丈欣然欲執筆。前日累書所以難之者。蓋專言在我之義耳。張丈讀來書甚喜。有悚然加敬之語。但云。

恐有做工夫迫切之病。答書中必自及之也。劉溫州素不長於筆札。若令出名。則非必誠。必信。若令渠自書。又恐其以不能爲解。須明說不計字畫工拙。但欲托名德以傳不朽。如此乃可商量定。卻見報不拯其隨之義。固由有所制。然必可隨者。盡所以拯之者。非未嘗拯而遽隨也。又隨之一字。甚有意味。常人於事嘗爭之而不從者。不得已而爲之。必有忿戾不平氣象。非所謂隨也。隨者。委曲妥帖。若已欲爲之者。但其心不快而已。無跡見於外也。叔昌必同做工夫。於哀敬中體察本心。最爲親切。

某官次粗安。葬儀同者。所編倉卒。有未精密處。不免再討論。屏置他事。竭三四日之力。始能就緒。向者張丈葬魏公。亦嘗講究。昨夜同穎叔到郡中商議。頗似穩當。其制作瑣細曲折。皆已口授穎叔矣。更宜詳講。如覺有未穩未密處。卽遣一介來商量。但須不雜以俗禮異教。乃善。親族間有未以爲然者。政當盡誠感動曉諭之。不可傷恩。亦不可失正也。宅兆已得地否。向聞毀瘠過甚。日夕嘗以爲憂。今戴在伯持片紙去。不知已見否。

某供職已半月。職業之所及。法令之所及。不敢不盡拙誠。但人習熟見聞之久。未孚未喻者甚衆。更看旬日如何也。張吏部對甚開納。乃知前此非進言之難。但言者自未得其道耳。卽今微陽蓋有復生之漸。但羣陰嶢嶢。消長之勢。殊未定也。明器用綵舁。無害。自餘並俟後便。來書過禮。前此固嘗拜聞。今復封還。某官次粗遣。近日思得內外相應。不差毫髮。外有齟齬。卽內有窒礙。只有反己兩字。更無別法也。學校間事。所以有一二中變者。止是初到據法宿假。必令簽歷。日到諸齋教導。皆令甲所載。旣而僚窳。皆大不安。

若不小爲通融。則不復可相處。以小事立同異而去。又似輕發。故令宿但假呈簿。簽歷必先經正錄。故甚以爲煩。本所以欲簽歷者。蓋要知諸生出入之疏數而已。今止呈簿。則亦自無所逃。諸齋教導。亦時復一往。緣此人情甚安。卻可以徐徐少致漸募。勸迪之功也。或未中理。更望指教。襄奉在近。辦集想極哀勞。誌銘。緣張丈部中兼曹頗多。前日致齋。方能下筆。其間有一兩字改處。背是後來再訂正者也。增琴瑟笙竽。及下帳上服。皆不愆禮意。可無疑也。持養察識工夫。政當並進。此外更須以友輔仁。德銳、仲益、穎叔諸公。旣有意於此。共相琢磨。乃善。此間士人。亦有十數欲向學者。八月稍涼。已與張丈約。共爲夜課。蓋日月殊易失耳。

某館下粗遣。但日以無補爲愧。對期尙在春夏之交。人事多端。政恐或未必能待耳。看書冊亦無全功。雖如子充、士龍。亦十數日乃一相見也。比來諸友講論。當日有益。每得來書。書辭皆有蹇然不自安之意。學者誠不可自足。又不可恐懼太過。大抵五六人羣聚其間。必有一人身任此事。以必到自期。則衆人亦恃以自彊。此政年兄之責。若又自恐懼疑惑。示不敢自保之意。則衆將誰恃哉。亦終於解弛而已矣。如年兄專勤篤信。同志中皆莫及。地步固已甚近。今當用功者。通其蔽。矯其偏。充其力。詳處其齟齬。斷截其牽制而已。政當摩厲先登。曷爲而有退保之形也。君舉、伯永亦已參學矣。王子合爲學錄。甚舉職。以此知人略有志。隨分量便得力。文潛近復差。湛挺之爲學錄。方三日。而遭憂歸闕。亦可惜也。

某居此粗遣。但深無補之愧。近日士大夫請去者。率艱難如丁子章。前月七八次往請。而不可。惟當循其

得爲他非所擇也。士龍方此講論，又將遣往淮上招集流移，自此益索寞矣。象先且夕當招來款語，自今去禪制，尚有四五月。喪禮早令見次第爲佳。弔慰妻家，以親戚恐可往，外人則不可也。若祥祭後居禪制時，則雖外人亦須往，禪本祭名，非服制也。

銘誌既有題額，更不當復寫某官墓誌，便當從頭直開誌文，而名銜則列於銘後，乃爲得體。銘當低於誌句空數字，撰書題額，名銜又當低於銘。異時刊成，龔丈處當專遣人送墨本，五月對劄錄去，不必示他人。上反覆顧問，酬酢

領略，既詳且款，凡所欲言者，皆得展盡，語甚多，不暇寫去，推對劄意可見也。張丈所對亦甚款。每與張丈說，上高

明開納如此，若常得正人吉士，啓沃浸灌，事安有不同之理。所恨此氣脈不復接續耳。張丈門庭甚靜，干請皆截斷，東閣固知敬，但在高位者，往往日聽逢迎可喜之論，故本分說話，未必能深領耳。然可以彌縫正道者，固不可爲此而不致區區也。利用大作，固當以此相儆，來諭韓、趙二公，乃本有美質，或實有此志，而無其學者，與此不同。卽今善類甚孤，羣陰崢嶸，密雲之戒，甚可懼。近日子充留此，於正道甚有助，此外確然向善者，惟芮丈而止耳。自此以往，若善類來者浸多，則事庶幾可爲也。上書得進，此門既啓，誠可慮。臘肉酷薑已領，竊意服制中，饋人恐不當以肉，自此已之，爲佳。

某入山之二月，卽遷過金柱，山水清峻，晦明百變，勢須且爲旬日留也。小留城中，經理荒政，甚善，大抵爲學政，不須求之事外，或未可動，不必作意。昨日得汪丈書，長沙猶未得全安之間，甚念之也。叔昌欲來山間，甚善，通鑑課不欲久輟，見所抹者，并以後兩三冊，或令叔昌攜來，爲佳。叔昌未來，則遣一人送至，此可

也。某還城之期，當在一月後。他俟面盡。

某度更須在金柱坐一兩旬。蓋耳目清淨，林泉幽邃，士人亦少。不過劉畏之輩在三數里內者。帶來人外，共只有三四人也。叔昌欲與江必東偕來，甚善。朱丈人已遣張丈得復常之間，甚可喜。疾病之來，要非一端。數千里外，難預料也。然日用飲食間工夫，政當細密，取信於人，猶是外事耳。因思鄰戒之畏，甚悚然也。某到山間近十日，初欲游歷近村，而窗明几淨，閤通鑑頗有緒，遂兀坐不復出戶也。詩兩種已收。看春秋三傳，伊川說之外，胡二劉（原父、質夫）陸（纂例、微）孫（微）皆當參看。然向時屢曾說病後且宜靜養，考凡例校異同，恐亦勞心也。通鑑欠後唐後晉紀兩冊，諸子欠韓非子上冊。今汪時法見有專人入城，若尋得付來爲佳。二月初當泛舟歸城中。他俟面盡，昆仲間並致意。

某以五半月後，同朱丈出閩，下旬至鵝湖。諸公皆集，甚有講論之益。更三四日，卽各分手。到信須留兩三日。次第月半決可到衢也。邇來日用間况味復何似？審觀來示，似猶有迫隘氣象，更放令寬平潤澤爲善。自餘悉俟面盡時法，必東諸友因見爲道此意，舍弟輩亦只示此紙，盛暑不能多作字也。

某旬日以來，編詩少曾出門戶。今日已斷手矣。侍傍小從容，甚善。到官之初，彌縫裨贊，不可闕人，而久不與事物接。旁觀酬酢之紛紜，亦可爲觀省之助也。天地間何物不有，要皆丕冒太和之內。胸次須常樂易寬平，乃與本體不相違背爾。艾軒畏事，自舊如此。然資質終長者也。聞重陽後歸，所懷併俟面盡。北山之行，亦留以相持也。

所苦聞已復舊甚可喜。然要須長養和平，勿用觸動爲佳。如此間日前無所不有，若一一關懷，則頃刻不可過矣。叔昌想旦夕須自嚴陵回，近禮部建請更變文體，大抵皆前輩之論。若果行此，則奇傑宿學皆得舒展。但世上溺於所習，故不能行，殊可惜也。叔源日來安健否？亦時觀書否？李壽翁改婺一方之幸也。此公守正而曉事，又不近名，婺人有休息之望矣。得手字，雖以向安爲慰，但筆力猶弱，切須凡事一切放下，專意恬養，常令胸次欣欣，如春木之向榮，則血氣不患不滋長，體力不患不平復也。一年兩大病，雖壯健者猶不能勝，况素怯者乎？若復依前失調護，可爲寒心也。

自聞叔度不快，寢食爲之不寧。一年兩次大病，豈易堪任。今幸向安，切須寬心自養，蓋此疾多是鬱滯所致也。又聞九哥亦嘗不快，不知果否。叔昌卻須安健，叔源增所事已了否。孺子且宜在家調護醫藥，只此便是爲學根本，妨廢舉業，乃至細至末事，須識別得輕重分明，乃善。以實錄一兩月間進書，日夕整頓，無少暇，略如編詩時，故不及作昆仲書，只出此紙同看。

某官次粗遣，日來圭角突兀之病雖去，而媮惰因循之病復易生，每切自警也。對班尙在八月，飽食隨衆，良愧負耳。聞氣體已復常，須常養胸次，令寬平和裕爲善，蓋不宜再有激觸也。史丞相雖爲柴端所擊，而趣召猶未已，不知果來否。鄭景望入學，舊觀浸還，若用人每如是，亦何憂不治也。天民、叔晦亦似有來意，但艱得缺耳。沈子壽繳章，乃謙之第一義，折其萌芽，亦不爲無益也。

某官次粗遣。他無足言者。聞舊疾又嘗小復發。莫已平復否。寬心乃止疾之本。天宇間何所不有。無爲強自苦也。某自入夏來。每至日落。乃出館。終日瀟然事外。不異山林。雖日來人情向背萬端。未嘗與之將迎也。以此頗覺頑健。大抵不問在朝在野。職分之內。不可惰媮。職分之外。不可侵越。自然日用省力也。

某官次粗遣。汨沒廢日。每以自懼。對班尙在來夏。苟是時猶未罪斥。則當致惓惓之義。然後謀歸耳。若徒往徒來。雖於私計爲便。而非心之所安也。近張伯永來。頗道德瞻甚進。極爲之喜。蓋爲學要是孚於近者。乃可一書告付之。或已歸。蚤送達爲佳。來論復求病源。竊謂源在自疑而已。前聖賢之訓。及向來講論。亦甚詳悉。今有藥未服。而更求方。據問頭卽是病源。更不須他求也。叔昌往見沈正卿。政當如此。爲學當眞知所止。前書所言。乃暫時意思。非究竟法也。

某到德清已數日。歸期更一兩日。事定方可稟妻父。然亦不出後月也。齋中想時蒙檢校。大抵羣居以和肅爲上。若爲學之志專。則是無暇及他事。况於規矩乎。見仲益諸友生。以此意諭之。謁守倅畢。卽交割人事。擾擾須更數日。乃定。學舍蕪甚。然鄭教授甚練事。款曲須同商量。整頓內不敢曠職。外不敢立異也。廡舍亦自明潔可居。已虛一室爲置榻地。月初千萬如約。趣權也。馬同年尙未會款語。前所說方教授氣貌亦自靜。但先入已堅。政恐難挽耳。張守聞已爲入對之行。其勢須來此。德銳課程。望時提督之。仲益因見亦告勉其卓然自立爲佳。

某到嚴兩旬矣。郡庠亦漸有次序。日以躬行務實之語薰灌之。不專講程文也。但殊難得有志趣者耳。蔣

從道之天甚可傷。慰書并祭文同往。錢八十五上足可用徐孺子故事。煩老兄親爲致奠。少見同舍之義。讀祭文。可就煩蔣子先也。

某官次粗安。張守舉措詳審。問學平正。而又虛心從善。善類中甚難得也。如知言中所疑。往往適同。幸日夕相與講論。甚可樂。至於形跡所當照管者。渠亦自解此也。如親少讀書。兩數官廳皆同。

某官次粗遣。學校間事已詳見叔度書中矣。大抵講論治道。不當言主意難移。當思臣道未盡。不當言邪說難勝。但當思正學未明。蓋工夫到此。則必有此應。原不在外也。來諭操存固所當用力處。要須與體察之功並進。乃善。

某官次粗安。對班只在下旬。區區所懷。自當傾盡。但慮識闇誠薄。不能爲損益耳。去就久速。過是亦可略見矣。天民子重召還於善類牢落之中。不爲無助。但卻是四民論薦。若到此。於交際間亦須斟酌。令淺深得所。乃佳。叔玠四事。此亦細故。固不可不料。理不可爲此。而凡事解體。蓋小事便阻撓。則爲下所窺。易得生事也。

與學者及諸弟

諸友來收書。知比來爲况安適。某官次粗遣。他無足言者。仲益送到同窗錄。已收。課程只須如此。中庸且專看龜山解。爲佳。純夫只在侍旁。開會甚得策。欲求繁冗中。不妨課程之術。古人每言整暇二字。蓋整則暇矣。穎叔在下塘。良便。近日玩繹何書。問學以致知爲本。知不至。則行必不力也。叔度兄弟喪禮。更與講

論有疑卽報來。元晦所幹若畢。早趣裝爲善。少望臨安之行。在何時。經由毋惜爲數日留。張守引進士子。孳孳不倦。又此間諸公問學者亦多。張守館客吳翬晦叔。向與張守同師。胡先生不從事科舉。已二十年。議論操履甚平正。相處亦有益也。子先所問。已見叔度書中。來嚴陵受葬儀。本無嫌疑。蓋叔度兄弟。豈世俗富家比。况來此間。又非往他處也。要先須遣人往張伯安處。取向日葬儀。攜來參酌。爲善儀禮疏。旬日間有便。先寄來。此間無借處也。天錫辭朱氏館。量而後入。政當如此。今莫已有定所否。今歲曾作文字。因便寄一二篇。然爲學要須日用間實下工夫。乃得力。城中如叔度、叔昌、兄弟及穎叔、德奉、子先、仲益、季益諸人。皆可往還也。天錫如見葉秀實。爲致意。近日讀書不輟否。有近作亦可寄數篇來。今因人回。略此爲問。他惟力學自愛。

學舍亦漸就緒。士人皆欣然爲學。向來舊弊。已革去十之六。正官亦極相亮也。蓋自到學。皆不曾別立規矩。及有所改更。但辰入未歸。以身率之耳。

官次稍安。學校事亦漸定。其間小節目亦稍變。而通之。使人情相安。然後徐徐勸誘。恐卻易入也。所疑各已批去。講實學者多。則在下移俗。在上美政。隨窮達皆有益。政當同致力也。

官所粗安。講學雖不敢自畫。但微言淵奧。世故崢嶸。愈覺工夫無窮盡耳。竊嘗思時事所以艱難。風俗所以澆薄。推其病源。皆由講學不明之故。若使講學者多。其達也。自上而下。爲勢固易。雖不幸皆窮。然善類旣多。氣焰必大。亦可薰蒸上騰。而有轉移之理矣。比聞諸友皆實有意於此。所以不勝其喜。非獨私爲異。

時有肄習琢磨之助也。雖然此特愛世之論耳。中天下而立。定四海之民。所性不存焉。此又當深致思也。穎叔所論謝語甚當。凡做工夫。宜皆精思深體。不可略認得而遂止也。德銳所問。已批去。大抵爲學思索。不可至於苦。玩養不可至於慢。專心致志。久久自然須漸有趣向也。叔源所苦。已無事否。子復何時可來。告先一月見報。卽當求檄誰往也。仲益德奉。曾問切宜警策之德不孤。必有隣。若講學實有次第。自然嚮向同志者多。此亦自驗之一端也。

別幅所論。向來工夫。如所謂毫釐或差。而反爲隨之病。所謂向之多塗。於此乎息。而領略之病始生。此非身親足歷用工之實。則不能知。殊用敬服。但論天尊地卑之義。謂明乎是。則復無可復。而隨不失其宜。頗似暢快。此兩句。雖是在顏子分上。猶未易言之。蓋知至至之。知終終之。階級歷然。非一步可升。一言可斷。若看得溥博親切。則始知工夫之益無窮。仁者其言也。詎良以此也。順以循序。乃體其全。利而爲之。靡或不偏。此四語。工夫甚正。易所謂序者。正當精察耳。爲之蹄筌。此句有病。末句。庶可與權。亦似太快耳。洙泗言仁。語孟精義。常玩味。工夫自不偏。但易傳精深穩實。孟子之後。方有此書。不可不朝夕諷閱也。長沙張丈常得書。每見其退然知難。收斂篤實。與前此相聚時大異。朱丈遣其子在此從學。音問常相聞。比舊亦殊精切也。敍鄒伸事。甚有補風化。文字亦無不穩處。但螢窗雪案四字。頗未典。易之爲佳。承上接下。最是親切工夫。呂與叔所謂嚴而不離。寬而有間。此兩語。殊有味。大抵盡範一書。須常置几案。時時觀省。所補不小也。持養之久。則氣漸和。氣和則溫裕婉順。望之者意消忿解。而無招拂取怒之患矣。

體察之久。則理漸明。理明則諷導詳款。聽之者心諭慮移。而無起爭見隙之患矣。更須參觀物理。深察人情。體之以身。揆之以時。則無偏弊之失也。

持養察識之功。要當並進。更當於事事物物。試驗學力。若有窒礙齟齬處。卽深求病源所在。而耨去之。知猶識路。行猶進步。若謂但知便可。則釋氏一超直入如來地之語也。

所謂無事者。非棄事也。但視之如蚤起晏寢。飢食渴飲。終日爲之而未嘗爲也。大抵胸次常令安平和豫。則事至應之自皆中節。心廣體胖。百疾俱除。蓋養生養心同一法也。荀子言喜事至則和而理。憂事至則靜而理。理者有條理而不亂之謂。

大凡親戚或有未中節。正當盡誠規勸。不可萌責望心。若胸中有一毫責望。則聲色之間。必有不可揜。而忤人之疾。此尤其是緊切用工處。

大抵房族間事。只要消平收斂。令小。不要展轉蔓延。令大。正己而不求於人。則無怨。所謂人者。指他人言。若親暱。則孟子所謂涕泣而道之。不可以己正而勿問也。政當盡誠委曲。曉譬感切之。尤須防爭氣。若有毫髮未去。則招拂激怒。所傷者多矣。若事果不可爲。當體不可貞之義。此必誠意已盡。自反已至。方可。

凡事有齟齬。必在我者有所未盡。此其形而彼其影也。於此觀省。最爲親切。敬之一字。固難形容。古人所謂心莊則體舒。心肅則容敬。此兩語。當深體也。

須令胸次開廓舒泰爲佳。

李仁甫以仲信上舍作策題問賢良爲言者併論遂皆去國此老蕭散平坦足爲朝列之重驟失此人甚覺蕭索累日寢食爲之無味也

屋已下手甚善規模須常令戢斂屋作三處極善蓋婢僕省得相涉則省得閑事極多而恩意常通也此間雖無憂責但日覺無意味又非五六月間比極欲生事粗有條理耳

到此年餘几紙上課冊長進甚多只是非紙上可寫之課冊長進者少如事親從兄處家處衆皆非紙上所可記此學者正當日夕點檢以求長進門路

收斂凝聚乃是大節目至於察助長之病乃是節宣之宜耳

李茂欽作魁大可喜年來爲學有意向者多爲儕輩笑侮往往不能自立因此可稍強其志氣雖學不待外然就渠地步上說事殊有補爾又可使世俗知本分爲學者初不與科舉相妨所繫殊不小也

比來諸况如何免對旣得省符向所取吉州三十口自當亟往止之不惟虛勞人往反蓋新治動爲人觀瞻不可不審也張守議論平正舉措詳審且又虛心從善在今士大夫中極難得也如財賦寬其苛細者其餘則拘收甚謹簡省宴會裁節用度元管罷出游止州治中點燈數百而已皆遵柳守之舊凡政事皆詳究本末反復熟議而後行繩治胥吏之欺罔者首決三都吏人甚快之而恕其不及大抵不墮一偏蓋皆爲學之力也已入奏爲嚴州百姓減免丁錢果若得請則一方民力甚寬亦非細事倉部家書

呂東萊先生文集卷六

記

隆儒殿記

仁宗皇帝皇祐紀元之三載。憲度鴻明。風化浹洽。折衷六藝。統一聖真。老師耆儒。濟濟在列。迺制詔有司。朕紹休聖緒。樂與据經守古之士。燕見紬繹。存神索至。用緝熙日就月將之學。肆開邃宇。廣邇英之廬。以爲講貫論說之地。顧扁榜之名未立。惟一二左右之臣。汝爲臣度等言。陛下尊隆儒術。肇新廣殿。親屈帝尊。博延承學之臣。右文之風。推校千古。無所與遜。臣不勝大願。請冠以隆儒之名。不諭聖志。臣昧死以聞。制可其請。是維文教之盛。照映國史。赫赫若前日事。臣幸得以鉛槧待罪。追述闕休。以貽罔極。臣之職也。用敢拜手稽首而爲之記曰。道待聖人而尊。故儒者之是非。必百世俟聖人而後明。自三代以來。尙文之主。史冊相望。褒衣博帶。禹行舜趨。肩相摩於朝。盛於稷下。論於石渠。觀於橋門。議於白虎。洋洋乎。聲明文物。去洙泗不能以寸。然束於詰訓。泥於古陳。滯固疎闊。弗知合變。質之以金穀甲兵之間。試之以浩穰要劇之地。則惶駭眩眊。無所措其手足。甚者誦六經以文姦言。逢君之欲。私龍斷以獵高位。爲世所患。若豪俊輕俠。憑陵翫侮。以儒爲戲。而真儒碩學。與蒙其恥。消于髡之徒。至譏評子思以病孟軻。久矣。儒者之不見信於世也。如漢高帝。宣帝。世所謂英主。槩以儒者爲無益於治亂之數。間登用一二。以備故事。貌敬而

心不隨。特以爲朝廷之羽儀。太平之盛觀而已。上以名求之。下以名應之。其不見儒者之效也。宜惟我國家。聖聖相授。尊道貴德。以實不以文。及我仁宗皇帝。紹天覺民。表章儒術。露門經幄。咨輒講肄。言成典謨。以隆儒之名。登諸扁榜。風示天下。羣士慕嚮。異人並出。輔成四十二年冠古之治。真儒之效。白於當世。向之詆訾儒術者。前倨後恭。自咎自悔。據子思之宿憤。刷孟軻之餘恥。千載之是非。至是而始定。信乎道待聖人而尊也。臣又聞之。漢肅宗皇帝。幸闕里。祀孔子。命儒者講論。帝謂孔僖曰。今日之會。寧於卿宗。有光榮乎。僖對曰。陛下親屈萬乘。此乃崇禮先師。增輝聖德。至於光榮。非所敢承。夫區區肅宗。固不足以仰望仁祖。竊嘗借是說而論之。則仁祖之創殿制名。臣亦將曰。此乃隆儒稽古。增輝聖德。豈特儒者之光榮哉。臣既述其事。謹待制旨而勒之石。臣謹記。

台州修城記 道熙二年十月朔日

臨海郡南東西三方。岸江湖。秋水時至。北限大山。蹙不得騁。怒鬻堤足。生聚廩廩。恃城以爲命。距海餘百里。逋亡剽俠之所曹。惡歲輒睢。盱洲激。睥睨郭。徼警者不敢弛柝。故閉脩之政。在是郡爲首務。蓋所以遠災害。銷姦萌。非徒區畫封表。備侯邦之制也。慶歷之水。幾不爲郡。元章簡公絳。來守而城復立。宣和中。盜發仙居。闖虛深入。內薄欲登。時則有戶掾滕君膺。帥厲吏士。圍以方略。寇不爲患。父老紀焉。乾道九年。里旅不戒於火。延及郡城。堵墮甃弛。徑踰無禁。害氣來格。民譌不寧。間一歲。太史趙侯汝愚。自信徙鎮。暇日循行。牆落。屬承掾而告之曰。置守所以衛民。顧屏蔽廢撤。若是。其何以待不虞。土功於古。雖有常律。傳

春秋者。復出啓塞從時之例。豈非城闔之啓塞。實有邦之大紀。隨時築治有不得而已者耶。况壯城之卒。月粟歲帛。凡以爲此益其食而寬其程。宜無不可。於是軍事判官蘇延壽受役要司。輦輦金穀之積。兵馬都監胡勝督裁巡功。察其勉與不勉者。命羣有司各保其所奠地。守傳衆力。埤增卑薄。塗塞空鄙。環城諸門。作新者四。曰鎮寧。曰興善。曰豐泰。曰括倉。脩舊者五。曰崇和。曰靖越。曰朝天。曰順政。曰延慶。起瀆熙二年六月癸酉。訖閏九月某日。累日積功。凡九千九百有八。大抵取其於壯城之籍。閒民願積工者。厚酬之。不欲勿彊會其數。視役兵財十之一。鍛斲鑿鑿黝堊之工。畀誠直如其素。醪醴之饋。勞來之間。相及於道。其材瓦石甃之用。積若干萬。若干千。若干百。錢以貫計。米以石計者。合若干千。若干百。有奇。維侯憂民急病之意。旣達於下。而精知周慮。又足以綜理之。故公無羨費。人無留力。工無餘技。役事首尾。再時。版甬並作。觀堞堀輿。而近郊之疇。初未嘗罅坼也。始。侯之至。詔奉計最朝。十月報政之期。甫半歲而贏。或謂是邦特侯假道休沐之地。繕營之鉅者。必姑存以須後。乃獨於入國阡陌未習之時。驟舉力政。百年之蹟。還於指顧。邦人德其賜而樂其成。請書勞於石。抑不知因事而功見。已事而迹泯。一壘培之緒業。於侯何有哉。至於不以久暫易意。眇然長慮於耳目之外。以無負於寄委。識此者。蓋亦鮮矣。遂書以諗台之君子。

撫州新作浮橋記 年全十一月

撫之谿。故無橋。乾道初。元知州事陳侯森始作浮梁。以通往來。淳熙二年秋七月。甚雨。淫潦漂航斷。無一存者。吾友趙景明適爲此州。復新之。以書請曰。曄試郡未幾。而橋毀。約已齎用。不敢賦諸民。造端以十

月戊寅。告具以十一月丁丑。部使者周侯嗣武。實佐其費。而屬役於知臨川縣江霖。橋東西相維。其脩百丈。聯舟爲梁。合五十有四艘。願記其成。以諗來者。子報之曰。橋梁。郡政之一也。子不忍涉者之病。政以時舉。亦庶乎長民者之心矣。然城闔之近。易察也。水潦之害。易知也。道路之謗譽。易聞也。至於不矚之地。未形之患。弗能自達之呻吟慨歎。昔之君子。惴惴焉惟此之畏。尙戒之哉。蓋心不在民。固負於師帥父母之名。慮不能周四封。則亦無以亢一方之任。所存者篤。所綜者博。其開塞建置。繼此而講者。則有次第矣。是橋也。特發政之始。邦人將惟子之視焉。無是心而有是政者。否也。有是心而無是政。非制於上而不聘。則壅於下而不流也。撫去吾州且千里。孰臨子上。孰承子下。吾皆不能知。獨以橋役言之。有部使者勸相。助以啓厥功。有縣令奔走服勞。以集厥事。以是而觀子之州。上下之際。輯矣。爲子之所爲。其何所憚。亦何所諉乎。邦人匪徒子之視。將惟子之望。且責也。因次其語。以遺撫人。俾立石水厓以俟。

秀州陸宣公祠堂記 四年四月

古者建學。先聖先師。各因其國之故。國無其人。然後合他國而釋奠焉。由漢以來。先聖先師之位。雖定於一。然郡邑先賢。亦往往祠於學宮。猶古意也。唐史載陸宣公贄。蘇州嘉興人。石晉時。吳越王元瓘。奏以嘉興置秀州。城東橋以宣公名者。先老相傳。公所生之地。郡學故有公祠。今郡守直顯謨。闞吳侯正己。復緝而新之。維秀陪翼行都。典治爲天下劇。侯獨置將迎期會之煩。表公以風厲多士。其亦知本務矣。初。公事德宗。人翰林爲學士。方禁旅四出。伐叛。公深以根本爲慮。論居重馭輕之勢。至熟悉也。未幾。溘卒。內訌。迄

如公憂奉天艱難之際。雖號親近。而志實不大紆。職在書詔。因得具著。天子悔過罪己之意。聞者流涕。人心已離。而復合。以使事抵李懷光。於立談頃。拔李晟之軍。已而平賊泚。收長安。獨晟軍是賴。官守所及。輒見一二。已足以再造唐室。苟帝以國聽焉。其所成就何如哉。起建中。歷正元。垂二十年。離合從違之變繁矣。確乎其不移。乎其不懟。聲聲乎其不厭。所積之厚。豈世所易窺耶。晚節爲相。經世之業。出之固有次第。始建白臺省。長官各舉其屬。議輒見格。然綱條本末。具載於章奏者。尙可覆也。旣貶忠州。闔戶人不識其面。專以方藥自娛。蓋畏天命。畏大人。負罪引隱於幽閒隱約之中。其志念深矣。雖德宗雄猜忌克。猶勞問有加。非公之忠敬有以發之耶。彼謂避謗不著書。殆知公之細者也。秀維公里。雋彥林立。公之精蘊。列於鄉論者舊矣。故於祠宇之成。誦所聞以質其中否焉。

泰州修桑子河堰記 五年二月

淳熙元年夏六月。泰州東部潮大上。敗捍海堰。詔州與兩使者參治。維堰初作於文正范公。首起海陵。尾屬鹽城。衡兩縣間百餘里。及是半圯於水。有司繕築。未幾以訖工。獨桑子河以南。邈如臯境。繚許氏莊後。皆文正規略所未及。春夏霖雨。海汐暴興。田廬冒沒。版籍日耗。詔以委今魏侯。侯不以造端立始。無前撫可襲爲憚。慨然閔民病之不可宿。凡土功之政令。與其具脩。悉蒐悉講。發命以四年十月乙酉。甫半月。堰成。其袤三十有五里。其崇尋有三尺。趾廣二丈四尺。積工一十有七萬。郡人擁府門。謹賀。又走書。勸記侯弗能禦。昔史起引漳水以溉鄴。追咎西門豹之遺利。杜預將橋大河。或者以商周所都。歷聖賢而不作。

殆必難立。二者之論胥失也。斯民之生理無極。而陵陸川浸之勢屢遷。顧守陳迹者。既不足與合變。至於因時建置。雖由己出。然前人仁心仁聞。經啟區畫之確業。蓋有以起之矣。侯名父子。逮見前輩。習於羣公先正之源委。一旦身履其迹。而手賦其功。宜所樂爲者。用能先事不惑。已事不矜。以興秦人之長利。以終文正公之遺緒。以助成明天子實邊之大計。後之爲政者。將於此乎攷侯名欽緒。歷陽人。洩役者。海陵尉朱棣督護者。知如臯縣耿漢。知海陵縣穆沂。

白鹿洞書院記 六年二月

淳熙六年。南康軍秋雨不時。高印之田告病。郡守新安朱侯熹。行旼陂塘。並廬山而東。得白鹿洞書院廢址。慨然顧其僚曰。是蓋唐李渤之隱居。而太宗皇帝驛送九經。俾生徒肄業之地也。書院翫於南唐。其事至鮮淺。太宗於汎掃區宇。日不暇給之際。獎勸封殖。如恐弗及。規摹遠矣。中興五十年。釋老之宮。圯於寇戎者。斧斤之聲。相聞各復其初。獨此地委於榛莽。過者太息。庸非吾徒之恥哉。郡雖貧薄。顧不能築屋數楹。上以宣布本朝崇建人文之大旨。下以續先賢之風聲於方來乎。乃屬軍學教授楊君大法。星子縣令王君仲傑。董其事。又以書命某記其成。某竊嘗聞之。諸公長者。國初斯民新脫五季鋒鏑之厄。者尙寡。海內向平。文風日起。儒先往往依山林。閒曠以講授。大師多至數百人。嵩陽。嶽麓。睢陽。及是洞爲尤著。天下所謂四書院者也。祖宗尊右儒術。分之官書。命之祿秩。錫之扁榜。所以寵綏之者甚備。當是時。士皆上質實。下新奇。敦行義。而不偷。守訓故。而不鑿。雖學問之淵源統紀。或未深究。然甘受和白。受采。既有

淮德之地矣。慶曆、嘉祐之間，豪傑並出，講治益精。至於河南程氏、橫渠張氏，相與倡明正學，然後三代孔孟之教，始終條理，於是乎可攷。熙寧初，明道先生在朝，建白學制，教養攷察賓興之法，綱條甚悉。不幸王氏之學方興，其議遂格。有志之士，未嘗不歎息於斯也。建炎再造，典刑文憲，浸還舊觀。關洛緒言，稍出於毀棄翦滅之餘。晚進小生，驟聞其語，不知親師取友，以講求用力之實。躡等陵節，忽近慕遠，未能闕程、張之門庭。而先有王氏高自賢聖之病，如是洞之所傳習道之者，或鮮矣。然則書院之復，豈苟云哉。此邦之士，盍相與揖先儒澗岡懋實之餘風，服大學、離經、辨志之始教，由博而約，自下而高，以答揚熙陵開迪樂育之大德。則於賢侯之勸學，斯無負矣。至於攷方志、紀人物，亦有士者所當謹。若李潛之遺跡，固不得而略也。侯於是役，重民之勞，賦功已狹，率損其舊十七八，力不足而意則有餘矣。興廢始末，具於當塗郭祥正所記者，皆不書。

重修釣臺記 七年五月

由東陽江而下，逕新定郡五十里，得嚴陵瀨。蓋東漢嚴先生遯世不屈，耕釣於富春山後，人因以名其地也。孫吳析富春爲桐廬，是瀨亦來屬焉。顧野王輿地志曰：桐廬縣南有嚴子陵漁釣處，石上平，可坐十人，名爲釣壇，卽今之釣臺也。獨兩臺對峙，野王所不載。蓋亦猶言之耳。明道二年，范文正公自右司諫守是邦，始築屋祠先生，而爲之記。瀨之傍，白雲源，乃唐詩人方處士故廬。文正公之遊釣臺也，嘗絕江訪其遺蹟，以其像寘祠之左。文正公沒，郡人思之，遂侑食於右坐焉。歲祀浸遠，此意弗嗣。淳熙五年，侍郎蕭公出

鎮道祠下。慨然曰：國家稽用唐武德舊典，姓是州曰嚴，則先生之祠，乃名教之首，頽圯若是，可乎？顧急於民瘼，未暇也。居二年，政成化洽，以餘力新之。時某病廢臥旁郡，公以書見，委記其成，固辭不可，乃復於公曰：方王氏移國，以光武之大志，先生之高氣，相與共學，夫豈區區呻吟佔畢之末哉？漢官威儀，旣復薄海內外，臣子之責，皆塞矣，亦何必奮臂其間哉？沒身丘壑，固先生之素尚也。帝睠焉有懷，俾以形傍求於天下，得非在庭諸臣奉令承教之不給，未有當帝意者邪？三聘而至，車駕卽日幸其館，勉其相助爲埋，所以處先生者，不薄矣。匪徒屈萬乘之重，爲故人之光寵也。先生雖以巢由自命，視一世若不足以挽之，觀與侯霸尺牘，剛切之意，見於言外，豈於帝睠睠未能忘邪？浩然而歸，使人主有終身瞻望不及之歎。施及後世，賓友耆俊，遂爲家法。士之聞風興起者，堅節正操，見危受命，項背相望，其有益人之國，與朝夕獻納雲臺之下者，未知其孰多孰少也。枝必類本，響必報聲，使先生微有意於傲世立名，一再傳之後，且將爲西晉之清虛矣。而東京之俗，久而益勵，名檢之外，綜理幹略，亦往往高出後世。泝其流而尋其源，則建武之高節，孰可訾耶？至於節義之弊，變爲亢激，特上無建用皇極之君，均調消息之爾，非造端者之過也。後先生且千年，文正公來主斯地，祀典始舉，曠百世而相感者，固自不常遇耶？今公作牧，復葺祠宇，以續前人之緒，繼自今以往，泝沿下上者，款門而心開，升堂而容肅，風清樾，濯寒泉，哦山高水長之詩，致足樂也。則公豈專爲一邦勸哉？祠之前，則羊裘軒，其東則客星閣，招隱堂，岸江立表，以識路，繚作亭，以行憩，或革或因，面勢位置，各有思致，皆受成於公，以非大指所存，故不詳列。公名燧，字照鄰，臨江人也。主其役者。

司戶參軍吳桂。

橫山吳君佚老菴記

橫山吳君珉。治別室之西偏。榜以佚老。休工歸役。斤斧收聲。輯杖立於前楹。聞竊語於階者曰。碁壘繩畦。坻粟京稼。籌算掛壁。萬貨四溟。此吾主人翁所以佚其老也。少進。至於門。聞行語於塗者曰。豐林邃宇。尊俎靜嘉。鷗鷺不驚。風月相答。此吾豪長者所以佚其老也。又進。至於郊。聞聚語於塾者曰。培嗣以學。旣憮旣寡。秩盡以禮。旣序旣飭。此吾鄉丈人所以佚其老也。他日。吳君爲予道之。予曰。夫三者之言何如。吳君曰。階得吾粕。塗得吾滴。塾得吾醇。出浸遠而說浸近。吾名吾室。義其究於此乎。予曰。未旣也。畏嶠登輿。身閒心慄。厭市築壙。目靜耳喧。君雖善自佚。縮闔以往。肩頰腹枵者。踵相接。歲或不升。脛瘠。困憊。呻吟交於大達。專一室之佚。樂乎哉。君。里中望也。蓋勸相族黨。惕勞賑乏。己責紆。逋同其佚。於是鄉。則盡橫山表裏。皆君佚老菴也。其視尺椽半席。廣狹何若。吳君謝曰。厚矣。子之拓吾境也。顧童奴陷其說於壁間。以爲券。

入越錄

淳熙元年八月二十八日。自金華與潘叔度爲會稽之游。辰後出旌孝門。五里。至關頭。南折入會稽路。二里。桐樹嶺。八里。東藕塘。城東陂塘。此爲大溉田。甚博。他時。秋夏之交。輒涸。今歲雨澤以時。田不印水。秋深。猶瀾漫也。十五里。舍香。民居頗成聚落。道旁野塘。木芙蓉初發。映水殊有思致。十里。義井。五里。上下倉。十里。孝順鎮。十里。自驛路北折入香山路。五里。宿杭慈潘氏莊。凡行七十里。是日。凝陰不開。風襲人已有力。

始御袂。四山雲氣滃然。岡巒出沒。申後微雨。夜遂大。二十九日早。冒雨行二里。小鳳林寺。涉溪。屈曲稻塍間。泥淖沒屨。五里。苦山二十里。梅口。邸舍蠲潔。勝官道。蓋行賈避義烏市征。往往出此。十五里。香山。林壑稍邃。八里。下稠巖景德寺。寺屋可百年。繪事皆朴質。飯于小軒。方池叢竹。皆有趣。然稍蕪矣。七里。塘口。自是復出驛路。老梧離立道旁。濯濯如青玉榦。又二里。宿逆旅。凡行五十九里。晡後雨始歇。所歷大抵匆匆。不能詳也。三十日早發。二里。石斛橋。溪流潺潺。岸旁大石如屋。橋西。走浦江道也。度橋而北。十里。石牛。有樓臨路。樓下牖戶亦明敞。主人留小語。云。創以待使客。非其居也。所謂石牛者。道下塘臥石若牛。水滿不可見。五里。洞井。居民依小坡植鷄冠花數百本。冠距低昂。大類尸鄉。呪雞翁舍。雲薄見日。已而大霽。十里。新界。自石斛橋道出。兩山間。少曠土。至此山圍始寬。秋稼極目。黃雲蔚然。過義烏。東陽。浦江。永康。四縣。巡檢察婺。越界焉。五里。邵家灣。觀五指山。其巔石如駢拇。然近視不若遠望。飯民家。舍後水竹可步。逢驅羊行賈者。數百蹄散漫山谷。風毛沙肋。頓有汛隴秋色。五里。涉楓江。土俗諺云。第一楊子江。第二錢塘江。第三楓江。蓋甚言其水波惡。實小溪耳。聞春夏頗湍悍。今僅至脛而已。南岸有覆斗山。山形正方。若斗覆。五里。興樂。槿花夾道。室廬籬落皆整。五里。界牌隴。平坡淺草。隱隱起伏。環山城立。真監牧地也。五里。牌頭市。道分爲兩。北道出漁浦。度浙江。入杭。東道入越。輪蹄擔負。東視北不能十一。市傍斗子巖。巖旁獅子山。首昂背偃。略類狻猊。五里。寒熱阪。五里。宿硯石邨。凡行六十五里。屢謁。逆旅牆壁橫斜。多市僧勝帖。大要皆尤人語。斯其所以爲市道與。悚然久之。九月一日。晨霧上橫隴。東嶂出日。金暈吞吐。少焉全壁徑升。

晃耀不可正視。升數尺，縹於雲，絢采光麗，因蔽益奇。非浮翳所能揜，露道風葉，皆鮮鮮有生意。五里，裏湖。五里，蔡家塢。五里，桐木嶺。五里，諸暨縣。入縣北門，人煙猶蕭疎。縣方築社，南垣兩松，樛枝小異。里許，至市。自縣治前，東折度下橋，橋屋半圯矣。並大溪行，流甚壯，其源一自東陽，一自浦江，一自孝義，至街亭合流。逕縣城，又逕蕭山浮橋，入浙江。縣東陶朱山，頗雄，自入新界，已巋然見之。出縣東門，山益遠，川原益曠，田萊多荒，蓋沮不宜稼而然。五里，放生橋。道左，女貞新葉生，黃綠間錯，如行閩粵荔枝林。五里，馬秀才店。店旁小室，隨事蒔花草，馬久罷舉矣。三里，雙橋坂。二里，烏石，其南入剡百里而近。十五里，苦李橋。溪磧頗清淺，木陰扶疎，百餘步入山徑。五里，至新店灣，復得平地。五里，栗橋。登栗嶺，五里，冷水，望東嶺神祠，縹緲雲間。下坂，相穰垂黃，際山數十里，平鋪如拭，洋洋乎富哉。豐年之象，道中所未見也。五里，宿楓橋鎮。前歲析諸賢之十鄉，卽鎮爲義安縣。今年五月廢，凡行七十里。薄暮，小雨。二日，辨色發楓橋，陰風薄霧，十里，乾溪。溪橋榆柳數百株，有十圍者。過橋繞山足行十里，古博嶺，嶺左右皆叢篠。五里，洪口，有別徑入，明白楓橋而上，美竹佳樹相望。近洪口，曲折循小溪，水聲瀾瀾，風物漸佳。十里，含暉橋亭，天章寺路口也。遂穿松徑至寺，寺蓋晉王羲之蘭亭。山林秀潤，氣象開敞。寺右臂長岡，達橋亭，植以松檜，疑人力所成者。法堂後，砌筒引水，激高數尺。堂後登塔，四五十級，有照堂，兩旁修竹，木樨盛開，軒檻明潔。又登二十餘級，至方丈，眼界頗闊。寺右，王右軍書堂，庭下皆杉竹，觀右軍遺像，出書堂，徑田間百餘步，至曲水亭，對鑿兩小池，云是羲之鵞池，墨池，曲水，乃汙渠，蜿蜒若蚓，必非流觴之舊。斟酌當是寺前溪，但歲久失其處耳。由曲水。

亭穿小徑，涉溪復出官道數里，買舟泛鑑湖，湖多湮爲田，所存僅如溪港然。秋水平岸，菰蒲青蒼，會稽秦望、雲門諸山，互相暎發，城堞樓觀跨空入雲，耳目應接不暇。入水門，過南堰，歷府天慶觀，至禹跡寺門，捨舟外氏寓舍。此寺拜外祖母溫國錢夫人、伯舅、叔舅、溫國八十一矣。氣貌視聽，纔類五六十人，與叔度同館於書室。三日，游外氏園，有梅坡、月臺、菊潭、杞菊堂、竹隱、蒲澗、橘洲，因寺廢地葺治之，十六七成矣。最勝者梅坡，遶亭皆梅，前對蒲澗、橘洲，野水灣環，島激掩暎，如在江湖，而竹隱一徑深幽，塔庭清闕，亦其次也。又過義恩師院，院與杞菊堂鄰，十年前嘗識之，午後自園後門穿僧菴，度小橋，轉三兩曲，至圓通寺，舊乃興福寺子院，去歲廢，興福入圓通，合二爲一，掃地更新，面勢端正，殿廡華敞，殿後猶未畢工，循舊路，後穿園中歸，園後邊河岸木成陰，舅氏云：此卽蜀椴木也。植之方數年，往時表裏無障蔽，今不復見道上車馬矣。杜子美所謂飽聞椴木三年大，信然。是日薄陰。四日，飯已，侍伯舅同叔度、詹季章，微之泛小舟出南堰，繞城緣鑑湖，訪蘇仁仲計議師，德於偏門外，皆前日初至所歷也。居頗穩愜，砌下瑞香兩本，面皆丈餘，仁仲、蘇子容丞相孫，致仕間居，年垂八十，道前輩事，聲譽不厭，出舊書數種，管子、後子容手書，慶歷乙酉，家君面付，猶蘇河陽所藏也。紙尾銘款云：惟蘇氏世官，以儒可以遺後，其在此書，非學何立，非書何習，終以不淹聖賢可及。其曰書秩銘戒者，子容所識，其曰先公銘戒者，銘語亦同。蓋子容之子所識也。紙背多廢，牋簡刺字異，今制者未云牒件狀如前，謹牒如前輩所記，署銜多杭州官，稱子容云知府舍人，乃知杭州時也。歸舟烟雨晡，游大能仁寺，闕壯光麗，甲於會稽，重殿複閣，金碧相照，寺吳越錢氏所建。

頽廢久矣。新於今主僧常坦之手。二十年前見坦於此寺。方爲板下僧。相與步敗簷毀垣間。慨然有興作意。具道規模次第。果不愆其素。有志者事竟成。如此。然益知民力之困也。五日。義恩師約飯。偕者蘇仁仲、伯舅、叔舅、潘叔度、詹季章、丁茂、丁松、年七、六、表弟、暨中食。開霽。晴光發窗。心目頗快。飯罷。復陰。晚步過寺橋。歷沈氏、李氏園。皆荒蕪。脩竹猶森然。六日。偕石天民、斗文、潘叔度。自前橋直道過郡庠。道傍多流水。喬木殊不類鄆市。教授廳後。環碧亭小。榻環亭皆水。敗荷折葦。秋思甚濃。石應之、宗昭、高應朝、宗商亦繼來。遂自直舍入學。夫子殿居中。脩廊廣庭。長松錯列。講堂榜以明倫。後有稽古閣。制作皆雄偉。而閣下尤勝。疏達開豁。擁牆密竹如雲。晚冒雨歸。七日。雨不可出。過詹季章位小閣。因重屋樓板。其間縱三弓。橫半之。南北取屋山爲明遠山。竹樹歷歷如畫。蘆簟仰承。穹窿若船背。幽潔極可愛。名以越舫。其狀真類小舟也。八日。早過大中戒珠寺。王右軍故宅也。屋多人少。頗牢落。門有兩池。亦稱右軍鷺池。墨池。略無意趣。政如天章者。皆後人彊名之耳。殿後地漸峻。石應之寓居在焉。遂與應之登雪軒。軒占臥佛殿右偏。湖山聚落。皆來獻狀。以宜於觀雪得名。今雖不與雪值。然霧雨空濛。亦奇觀也。寺後卽蕺山。蕺菜名。圖經云。越王嗜蕺。嘗採於此。九日。早雨少止。侍伯舅同潘叔度、詹季章。汎舟赴蘇仁仲飯。舟經臥龍山下。竹洲柳岸。略如茗雪。臥枝拂水。尤奇。飯罷。登舟。中塗小泊。步游西園。郡圃也。其北飛蓋堂。下臨大池。其中集春堂。四隅各一亭。東春榮。西秋芳。南夏陰。北冬瑞。其南陽波堂。面城。水木幽茂。兩小亭對峙。東曰逍遙。西曰裴回園之西。卽曲水。先入敷榮門。右轉至右軍祠。穿脩竹塢。遂登山。山蓋版築所成。繚繞深邃。曲徑回

復迷藏亭觀乍入者惶惑不知南北山背有流杯巖鑿城引鑑湖爲小溪穿巖下鍵以橫閘激浪怒鳴過閘遂爲曲水旰廡華敞樑棟椽柱皆塗斲象竹遠以清流鑿以蒼石犬牙參錯殆若天成俯砌水中爲墩流杯至墩傍輒自近岸蓋廡中爲三井吸水勢使然曲水之上激湍亭惠風閣規撫若都下王公家山頂崇峻菴其勢騁懷亭面亭依山爲巖壑然皆塗墍不可支久下山右遠至清真軒刻桷象枅欄平階茶靡架甚茂但爲蔓草縈亂刺眼耳曲水乃前守史丞相浩所鑿往年見其新成今竹樹皆成陰而亭榭稍稍圯剝矣復登舟還禹跡十日午後同叔度汎舟過南堰出門穿鑑湖支港斜雨入篷衣袂沾濡七里獨山野極烟樹可畫出口港漸狹又七里道樹捨舟步田間泥潦沒屐一里許至堅密菴拜外大父墓菴屋纔八九間牕檻幽潔夜分四山風雨翛然如聞秋聲十一日晨起冒雨躡屐登舟入城至能仁寺赴常坦師飯七六弟在焉遂過報恩光孝寺寺後飛來山卽圖經所謂怪山也傳云自瑯琊飛至其說不經其巔有塔采綯甚華塔下有鰻井乃小石竅自唐以來神之謂鰻能時出妖祥近世不復見矣非故依山坳坡陁有古意近僧整使就整遂無可觀有濮安懿王祠廟寓此寺有園令領吏卒守之主僧明哲往歲嘗識之新昌設蜜朮湯甚清美晚還禹跡十二日雨不可出借圖經尋近城名山須雨霽徧游晚石應之來宿十三日過午雨止諸葛壽之千齡高應朝石應之孫季和應時約往丁氏園遂同汎舟至新河步入園園多海檜但綰結闕其天性後牆皆密竹軒楹太敞宜夏不宜冬宿東偏小室會宿者叔度應之季和十四日自丁氏園偕叔度壽之應朝應之季和登舟出五雲門入鑑湖湖面獨此爲闊隆興初吳

給事芾浚湖未一二尺。多得古棺。皆剝木爲之。蓋漢末鑿湖前古墓也。然後知古人爲湖。特因地勢築堤。堤立而湖成。不待深疏鑿也。今自五雲門重堤。隱然達於曹娥五六十里。民間謂之省塘。此乃故湖堤。湖田之民。每毀堤以決積水。故堤缺而湖廢。異時有意復湖者。第修完省塘。則盜湖之田。不待廢而自爲陂。灤矣。自湖尾入若耶溪。過後漢鄭弘廟。傳所記樵風蚤暮。迎送舟楫。采薪者云。至今猶然。半里石帆山。山橫若張帆。又數十步。秦始皇酒甕。乃山腳兩石。粗類甕盎。又一二里。艤舟游龍瑞宮。方士謂之陽明洞天。穿松徑數百步。至宮。宮後三峯。翔舞飛動。勢若覆壓。大略如栖賢望五老。特欠其二耳。中峯乃會稽山祠。官春秋用事焉。由西廡循山逕。觀龍見壇。其旁卽禹穴。乃大石中斷成罅。殊不古。殆非司馬子長所探也。又數步。飛來石。老木槎枒。石壁如削。緣磴道至錢秀才菴。遂自東廡出院。院皆扃閉。獨遇一客。道士云。縣州人。復登舟。徑鑑湖。湖天夕照。水邨漁屋。皆被光景。日所入。諸山如在金霧中。天下絕境也。暮泊□成觀。宿於明遠堂下小室。後缺。

序

送張孟遠序

僕生而底滯。少長嗜學。失其指益。以自愚坐一室。頽然移日。足欲跨戶限。若有藝而留之者。郡邑教條。風土謠誦。隨聽隨忘。謾不省何等語。諸公長者。歲時聚會。或賜餘瀝。顧視左右。頽頽作氣。長飮大嚼。目眩心悸。感感不安。席酒一再行。輒自脫歸里中。豪浸羞與予伍。雖予亦毒之狀。其疾謁諸人。方屢試。竟不售。有

自衢來者。詫以吾鄉有偉男子。橫厲超軼。絕出無輩。是殆能瘳子之疾。徐舉其爵系。乃吾同年友張孟遠也。予聞自喜。銳欲往從之遊。旣舂糧矣。而孟遠在門。予益喜。過望。與之上下論議。明雋闕達。舌端河漢。一落千里。未改句。自視胸中隘者。寬窳者。通狹者。廣向之。瓶罌。今浸化而爲甕盎矣。向之沼沚。今浸化而爲澗溪矣。方幸其若是也。孟遠遽告行。引紙操筆。將以酬孟遠之勤。府藏殫竭。毫征縷斂。卒不得一語。意慚甚。客從旁解之曰。子不聞陶朱公之語乎。陶朱公之友以篋聞於楚。陶朱公往過之。欲別謂其友曰。何以餞我。其友曰。吾終歲殮。不滿子一飯費。前馬後乘。劍佩鏘鳴。供子指呼役者。乃吾疇昔震栗不敢仰視者也。子不能捐萬斛之升斗。以起吾病。反於我乎。索忍人哉。陶朱公曰。是所以賜我也。汝之陋。在吾則爲儉。汝之儻。在吾則爲恭。貧之病。富之藥也。敬再拜受賜。以孟遠之贍於學。而道今古。角詞章。其前是猶篋人。子與陶朱公競富。雖市人亦擲揄之。儻亟自吐實。盡發前日之痼疾。而不敢蔽。則異時環倉華而第百藥。庸知不獲附於下中之品乎。子又奚慙。僕曰。唯。

戴衍字序 乾道五年

己丑之夏。予將有餘不之役。舟旣戒。謀休櫛息。纜之地。篙師舉手東。其指曰。道雙溪三十里。靈洞在焉。蓋趣權以逋午暑。予款其名久。適與心會。戚友尊稗。靳共載者八九人。舟尾炊未熟。已就岸。相與屐屨。燧燧。目隨步改。大巧巨麗。皆前人之所未品。竣事。念勝遊之不可虛也。屬昭武李仲南大疏偕。者里繫。次其齒。識壁間。吾友戴衍景杜。班在八。仲南倚筆。請曰。晞古鄉賢。著名字以示不忘。固多前比。然祁公言論風。

旨猶相接若兼氏而書東行西行者或援避賢郵以病靈洞壁則何如歟子瞿然謁子更其字子嘗讀易矣需之既濟曰需於沙孔子象之曰衍在中也天下之至險莫如水水與泥際而泥復與沙際山沙望水其險浸已遠矣履深淖而並驚瀾雖慙恐使疾驅且不敢至於磧平如砥萬轡一馳獨能泥而奔之足於險未迫之時夫豈徒哉是中非躁迫者所能駐舒徐容與久在此而不前殆必博大廣衍綽有餘地者也易象既言衍而踵以在意者將示所居以占所養歟在南曰橘在北曰枳失其所在則名去之心不在廣莫之鄉而強以衍自許疇諾之哉貌示閒暇嗜利逞欲以蹈大險如管之衍蓋辱其名矣洗此名之辱者惟吾子是託故以在伯侑子名子其勉之毋躁毋迫無厭淡泊無失子之真在則口是名於席筆是名於牘俯仰皆無愧也子其勉之在伯志士也所自期者遠甚故子不敢置孔子而言他

洪無競字序

武川佛廟領於祠官者四十有二曰明招則子松楸所託也率三歲科詔下邑士相與爲曹依僧房以專肄習明招林麓闕邃棲研席其間者視旁寺爲多鷄一鳴弦誦之聲與鐘梵交於戶庭日旰休帙岸巾曳屨相追於松陰子時往參焉問以後進之秀或枚數以對屈其指未三四而得洪裊然名子固私竊識之他日童奴持謁入望其刺端若洪其姓者取而視之乃疇昔松陰所談者也子亟迎之門輿俯酬酢惇懿瀟靖雖中朝故家名子弟生長禮法中足未嘗涉外闢者猶不能過焉出其文甚澤而暢充其科者也旣數面稍狹子試開之學洪子慨然有志浸喜從子游語次顧視几上前日刺猶未漫因舉以諗洪子曰子

志古而科目是羨，非名也。盍歸而謁諸親，無何，洪子復於子曰：「吾親命以無競，更故名而虛其字以待。敢請，予歎曰：『羣童相呼而趨果餌，攫拏者既屬厭，而袖手者猶未沾齒。自垂髫之時，競者固已居其右矣。束髻而冠，其競愈大。險指聲利之標而輩逐之，退縮不競者閭巷。』」相傳以爲諱。子之親獨取彼之所諱者爲子名。意者患苦鬻競，將還子於無求之地乎？世路日狹，一有所求，四向荆棘，然尙有一途，平寬廣博，游之無禁，行之不窮，驅馳疾徐，惟意所適，舉世莫與競。子往而求之，執禦焉，敬以求仲副子名，并序其語，以問發軔之期，道逢策馬競進，尤子之多求者，其與俱來。

李仲南集古錄序

觀物者必於其會，餅水知天下之冰，堂下之陰，知日月之行，理則固然。然未若廣川大陸，會三光五岳之氣，闔明晦，轆轤升降，一覽而盡，陰陽舒慘之變也。堙壘沉鼎，頽跌仆碣，布濩於莽蒼之濱，餘款墜刻，流落人間，財以侑几案，虞賓客而止耳。自歐陽文忠公始合而輯之，和者踵武，靖康之後，皆有錄無書。吾友昭武李丙仲南父講肄論述之餘，采擷裒積，越二十年而天下聞碑名蹟，舉集其門。起夏后氏竟五季，著錄千卷，百世之消息滿虛，斂然具見於細帙之上，愈遠愈簡，愈簡愈真，天幕神畫，不落雕斲，太古之遺風可挹也。文雖日緜，體雖日備，而渾灑之氣實行乎其中，三代之損益可知也。下此則廣者狹者，濇者漓者，肆者拘者，有萬不同，蓋莫不與時偕也。雖其褻羣絕輩，號爲獨出一時，反復觀之，要亦不能出也。書在六藝爲末，於其萃聚，則有大者焉。物之會，其可觀也哉！予嘗有幽憂之病，胸次偃側，往從仲南父引卷徐展。

轟鼎之潤。篆籀之光。映發左右。爽然神解。竊意古人不必親相與言者。殆如是。固未易苟以玩物訾之也。其他如正歷紀。定世繫。刊疆域之語。矜官制之舛。存容曲之舊。裨凡將之缺。尙非一條。在取之者如何耳。至於聚散之相尋也。珍怪之無涯也。晤賞之不可遂而極也。心思之不可困而滯也。仲南父則既知之矣。

大事記序

司馬子長年表。大事記。蓋古策書遺法。獲麟以上。既見於春秋經。周敬王三十九年以下。今采左氏傳。歷代史。邵康節先生皇極經世。司馬文正公稽古錄。資治通鑑目錄。舉要歷輯而廣之。意所未安。參稽百氏。頗爲增損。書法視太史公所錄。不盡用策書凡例云。起春秋後。訖於五代。分爲若干卷。迪釋若干卷。解題若干卷。合若干卷。

銘

陳同甫厲齋銘

參政周公銘陳亮同甫之室曰。中陳子事斯語而知其難。更榜以厲。厲也者。所以用力而擇乎中也。其友呂某爲之銘。

泝流之舟。挽之爲遲。下坂之車。梘之猶馳。木火金水。燥溼不齊。有習有積。有居有移。亦能用力。斬適厥宜。凡此數者。蓋陰乘之。潛有所警。默有所虧。是過不及。察之甚微。凜乎其嚴。岌乎其危。匪曰設戒。理則如斯。不將不迎。不留不處。敬而無失。大中之矩。

陳同甫恕齋銘

實理難精。實德難居。實責難副。實病難除。實知其難。於人則寬。惟實惟寬。惟恕之端。天地變化。草木繁蕪。蹟厥實然。可求其故。陳子作齋。侑坐有勒。匪尙其通。亦尙其塞。

贊

薛畏翁真贊

今衣冠古風節。室如冰。衾如鐵。佩所聞。穉既盍。見汲公。無愧色。

從祖父楊帥真贊

兩鬢憂邊。先白。寸心爲主。常明。申許汝一作汝。衣冠盛事。江淮草木知名。

辭

潘自厚字辭

括蒼潘景憲叔度。名其子自厚。謀字於其友呂某。某復之曰。冠而字。周道也。弁服未加而字。是圖預也。後世先禮而冠。蓋有先冠而字者矣。眎言攷義。莫協身甫。申之以辭。竣講冠禮而用焉。其辭曰。

令月吉辰。秩筮蠲尊。乃如爾服。諗厥本根。繫人生厚。百世一原。遷厚居薄。奪毗鬪昏。孰慙爾衢。孰建爾門。反身而誠。爾本爾存。相彼狐貉。大摯聿溫。爾服遯道。義用不敦。相彼蠹薨。大饗聿殮。厚於小體。跖弟躡昆。厚於大體。堯牆舜藩。衆萬錯陳。旁薄昆侖。何物非體。不合而渾。身斯釋斯。爾名式尊。曰伯身甫。永矢弗緩。

題跋

書楊次淵之父所藏舊遊諸公手簡後

盛山十二詩前唱後和者長慶間皆集闕下敗楮瘴墨奕奕頓有生氣今楊侯自放林壑間其視韋闓州老身廊廟未知孰得孰失而同帖四君皆發聲於時嗣德有繼異時一笑相遇細數盛山詩軸中人必將曰爾何曾比予於是

書校本伊川先生易傳後

伊川先生遺言見於世獨易傳爲成書傳摹浸舛失其本真學者病之某舊所藏本出尹和靖先生家標註皆和靖親筆近復得新安朱熹元晦所訂讐校精甚遂合尹氏朱氏書與一二同志手自參定其同異兩存之以待知者既又從小學家是正其文字雖未敢謂無遺恨視諸本亦或庶幾焉會稽周汝能堯夫鄮山樓鏗景山方職教東陽乃取刊諸學宮

書薛畏翁訓飭孫詩後

元祐諸公以簡靜無求爲家法畏翁親承其言論風旨典刑肅然尙見於筆墨間以仲其敬承之

書趙路分行實後

無所歆羨而爲善無所創艾而不爲惡此天下之實德君子也趙侯以諸王孫衣食縣官非縉紳名論所能軒輊而至性馴行隆洽飭備蹈儒者之所難夫豈有爲爲之哉自著作君以昌言冠大庭士大夫間稍

稍傳誦侯事。世或謂侯隱德。待其子而發。是殆不然。侯之所以自致者。如水必寒。如火必熱。政使名不出家。於侯何所加。捐。乃若著作君之所立。其資取培益者。雖博。至於忠愛惇篤之意。隱然行於政事文學之中。有非師友所能預者。其所從來遠矣。論者則未之見也。處者易持。出者難工。馳騁富世。萬變錯陳。其視前人之素風。澹矩凜凜乎。真若奉槃水而涉春冰。然則著作君之紀載。豈徒顯揚爲不朽計哉。抑將洪源景高山。晝誦夜思。期無忝所生云爾。

代宰臣虞允文恭書御書崔寔政論下方

皇帝臨御之九年。恩浹教孚。方內順適。小大之臣。旣材諸位。謹曰。天下事今治。宜勿復有爲。皇帝曰。嘻。是烏足究其極。維予九年于茲。夙寢晨興。將篤我祖宗成烈。凡奔走先後。以就予事。惟時公卿大夫。而安習所見。謂足以止。其何以底於大寧。於是數用治道。不進讜論。一。二大臣。已乃親御宸翰於漢議郎崔寔政論。幸賜臣允文。若曰。士俗流失。使天下事格而不得爲。如崔寔所指。臣允文當任其責云耳。臣允文承受震悸。自惟驚散。幸以際遇。待罪宰相。日聞德音。弗克以時風曉在庭。俾諭上旨。而恬於積習。節趨不立。以仰頌明章。奎畫明示。大訓使知。今日急政所在。其何以爲報。用三復寔言。冀萬一服行少分。以稱隆旨。竊嘗究觀漢自安順以降。天下蕩然。無復典法。一世賢者。如楊震。杜喬。李固。陳蕃。諸人。繼起爲輔。莫不欲整天綱。正官邪。以清四海。然志卒不遂。而禍辱隨之者。寔惟悠悠之談。樂寬弛而羞法制。使當時國論。靡有所定。此則寔之論所由興也。而其大率不過以達權救弊。與俗士相上下。若切切於數君子之見。倚奪者。

故司馬光論之曰。漢法嚴矣。而崔寔猶病其寬。何哉。衰世之君。率常庸凡。愚庸之俗。惟知姑息。是以權倖之臣。有罪不坐。豪猾之民。犯法不誅。仁恩所施。止於目前。姦宄得志。綱紀不立。謂之論以矯一時之枉也。光之言。可謂盡寔之心矣。以陛下天德地業。皇帝王之事。惟所欲用。顧於寔嘗焉。獨有所求。遂使匹夫之遺言。一旦煒然震發於昭回之間。非聖哲獨觀。有以見天下之動。孰知夫寔之有味其言哉。然遭漢季。無復一君足望救時之弊。亦安能使之純法八世。致理於時。其曰參以霸政。其心蓋有抑鬱而未之盡者。至所謂大定其本。師五帝而式三王。棄苟全之政。蹈稽古之蹤。此陛下聖學之緝熙。在今日之所當講明。特稷契之佐。伊呂之輔。曾未如卒章所云。此則臣之所甚懼也。惟陛下選建其人。必極於三五之隆。而後稅駕。誠不勝老臣惓惓之義。敢以宸翰鏤之樂石。昭垂訓戒於萬斯年。爲嚮方砥節之勸。併味死附見下方云。

書袁機仲國錄通鑑紀事本末後

通鑑紀事本末。袁子所輯。章首則楊子之筆也。庚寅辛卯之間。袁、楊風節。隱然在兩學間。予辱爲僚。相與講肄。蓋日有得焉。憂患索居。舊業湮廢。袁子官旁郡。憫其孤陋。乃以是書開予。予慨然曰。通鑑之行百年矣。綜理經緯。學者鮮或知之。習其讀而不識其綱。則所同病也。今袁子掇其體大者。區別終始。使司馬公之微旨。自是可攷。躬其難而遺學者以易。意亦篤矣。昔者司馬公與二劉氏、范氏、繙中祕外邸之書。餘二十年。其定爲二百九十四卷者。蓋百取其一千。取其十也。覽者猶難之。若袁子之紀本末。亦自其少年玩

釋參訂本之以經術。論之以世故。廣之以四方賢士大夫之議論。而後部居條流。較然易見。夫豈一日之積哉。學者毋徒樂其然而深思其所以難。則幾矣。

題近思錄

近思錄既成。或疑首卷陰陽變化性命之說。大抵非始學者之事。某竊嘗與聞次輯之意。後出晚進。於義理之本原。雖未空驟語。苟茫然不識其梗概。則亦何所底止。列之篇端。特使之知其名義。有所嚮望而已。至於餘卷。所載講學之方。日用躬行之實。具有科級。循是而進。自卑升高。自近及遠。庶幾不失纂修之指。若乃厭卑近而鶩高遠。躐等凌節。流於空虛。迄無所依據。則豈所謂近思者耶。覽者宜詳之。

書伯祖紫微翁外祖曾文清公所寄許子禮吏部詩後

聞之諸父。吏部去國。退居臨川。極意窮探。前輩源委。以專殖經世久大之業。善類皆屬心焉。非獨以一時與秦丞相同異爲諒也。身方沒而道始開。有志之士。未嘗不歎息於斯。因讀伯祖外祖詩卷。輒附見於末。書伯祖紫微翁贈溪先生子詩後。

臨川耆舊汪謝饒。皆出滎陽公之門。德操旣遁。世不耀。無逸亦以布衣死。志節稍見於世者。獨青溪先生而已。紫微伯祖與青溪忘年交。序引所述備矣。後一詩。勉戒其子。篤至嚴正。真前輩丈人行語也。

書焦伯強殿丞帖後

焦伯強先生之。穎。歐陽文忠公爲守。先正獻公爲貳。王公深父。常公夷甫。爲州民。伯強實爲守客。未幾

去文忠而依正獻。又得我滎陽公兄弟爲學徒。一時賓主師生之際。盛矣。其在家塾。師道甚嚴。律諸生事。事皆如節度。滎陽公旣壯。徧游諸公長者之門。多閱天下之義理。晚歲學成行尊。顧獨睠睠於伯強。曰。吾所以不辱先訓。蓋焦公力也。伯強經行儒者。皆知推先之。獨記家世所傳如此。

代宰臣史浩等書御製秋日幸祕書省近體詩下方

臣等仰惟皇帝陛下。宵旰萬微。身濟大業。雕琢夸詡。浮靡虛橋之習。是抑是黜。囿游池籞。宴豫虞樂之舉。是損是蠲。居焉非本。實不親動焉。非法義不舉。瞻茲三館。乃儲藏典訓。長育英峻之地。自紹興清蹕下臨。迄今三十有四年。思欲饑刑丕蠲。以增光聖緒。粵九月朔辛酉。詔有司戒期。十有二日壬申。幸祕書省。受朝右文殿。移御祕閣。絢光堯太上皇帝寶章。以視羣臣。旣又脩太平興國故事。張宴右文。酒五行罷。鸞翼日。癸酉。內出御製詩。賜臣浩以下。昭回淵耀。參賁圖書。鴻大閱深。匹休雅頌。臣等下拜登受。相與齊袂。敷釋寫指。蓋在昔聖人以開物之智。立經陳紀。通於萬世。惟有道之主。爲能監世盈虛。則象成憲。立一王法。是之謂稽古。文武並用。久長之術。惟崇起經藝。褒表儒學。用能章明大誼。馴服雄競。俾咸知尊君親上。茂集駿功。是之謂右文。國以人爲輕重。士氣之肆拘信屈。論世者必觀焉。惟虛己忘勢。然後羣獻幅輳。展布四體。樂盡其心。是之謂禮賢下士。大哉王言。堯舜禹湯文武之隆。由此其選。固非墨客槧人。一時私以爲榮。觀臣等昧死。請勅諸琬琰。貽諸億載。與日月雲漢。同垂無極。制曰可。謹具著其語下方。以風示宇內。德意志慮之所嚮云。

書鹿鳴之五送謝光中題其後

長沙謝敬之光中。以淳熙己亥十月來婺講學。以明年三月辭歸省親。將別請言。予病不能也。諸友乃取讀詩記小雅五篇。共書以餽其行。常棣之卒章曰。是究是圖。亶其然乎。敬之其勉之。時方聞張荊州之訃。三復和平之句。爲之泫然。

題伯祖紫微翁與曾信道手簡後

先君子嘗誨某曰。吾家全盛時。與江西諸賢特厚。文靖公與晏公戮力王室。正獻公靜默自守。名實加於上下。蓋自歐陽公發之。平生交友。如王荊公。劉侍讀。曾舍人。屈指不滿十。雖中間以國論與荊公異。同元豐末。守廣陵。鍾山猶有書來。甚惓惓。且有絕江款郡齋之約。會公召歸。乃止。已而自講筵還政路。遂相元祐。二劉三孔。曾子開。黃魯直。諸公皆公所甄拔也。侍講於荊公。乃通家子弟。李泰伯人汴。亦嘗講釋焉。紹聖後。始與李君行游。晚節居黨籍。右丞以筦庫之祿。養親。雖門可設爵羅。然四方有志之士。多不遠千里。從公。謝無逸。汪信民。饒德操。自臨川至。奉几杖。侍左右。如子姪。退見右丞。亦卑抑嚴事。不敢用鈞敵之禮。舍人以長孫應接賓客。三君一見。折輩行爲忘年交。談賞篇什。聞於天下。是時吾家篋筥瑣碎。僮僕能書。諸名勝無不諳悉。南渡以來。此事便廢。紹興初。寇賊稍定。舍人與諸父相扶攜出桂嶺。謁臨川。訪舊友。多死生慨然太息。乃收聚故人子。曾信道輩與吾兄弟共學。親指授。孳孳不怠。旣又作詩勉之。今集中寄臨川聚學諸生數詩是也。自秦氏專國。風俗日益隘陋。吾几筵間無江西書札久矣。蓋江西人物之盛衰。觀

人文者將於此乎攷。而吾家江西賢士大夫之疎密亦門戶興替之一驗也。言畢復蹙然久之。某再拜識之。不敢忘。建昌曾信道丈。以學問識度爲舍人伯祖所許。不幸早世。其子擲節夫。復與某爲同年進士。而節夫外舅李夔州。則某少所承事者也。故雖未得與節夫合堂同席。而知其父子之賢爲詳。病廢三年。不復知戶限外事。今年春。節夫以伯祖與信道丈尺牘墨本見遺。反復展玩。不能去手。顧諸弟曰。吾家其猶庶幾乎。今日真得江西書札矣。因錄先君之語寄節夫。且以交相厲云。

書所定古周易十二篇後

漢興言易者六家。獨費氏傳古文易。而不立於學官。劉向以中古文易經校施孟梁丘經。或脫去无咎。悔亡。惟費氏經與古文同。然則真孔氏遺書也。東京馬融、鄭玄皆爲費氏學。其書始盛行。今學官所立王弼易。雖宗莊老。其書固鄭氏書也。費氏易在漢諸家中最近古。最見排擯。千載之後。歸然獨存。豈非天哉。自康成輔嗣合彖象文。言於經學者。遂不見古本。近世嵩山晁氏編古周易。將以復於其舊。而其刊本離合之際。覽者或以爲未安。某謹因晁氏書參攷傳記。復定爲十二篇。篇目卷帙。一以古爲斷。其說具於音訓。

